

四庫全書

史部

欽定四庫全書

史部

陝西通志卷六十六

詳校官監察御史臣劉湄

檢討臣德生覆勘

總校官降調編修臣倉聖脉

校對官中書臣李荃

謄錄監生臣孫炯

欽定四庫全書

陝西通志卷六十六

人物十二

列女一

上古

任姒神農氏母有嬌氏女登為少典妃遊華陽有神龍

首感生炎帝長於姜水

史記五帝本紀注
姜水在今寶鷄

夏

女志夏禹母有莘氏女是生高密

史記夏本紀注 今鄆陽南二十里有古

莘國

周

太姜者王季之母有邵氏之女太王娶以為妃生泰伯仲雍王季貞順率道淵智非常太王謀事必與太姜

劉向列女傳

太任文王之母摯仲氏中女王季娶以為妃太任之性端一誠莊惟德之行及其有娠目不視惡色耳不聽

淫聲口不出教言生文王而明聖君子謂太任為能

胎教

列女傳

太姒者武王之母禹後姒氏之女在郤之陽在渭之涘
仁而明道文王喜之親迎於渭及旦夕勤勞以盡
婦道號曰文母文王理外文母治內生十男自少及
長未嘗見邪僻之事

史記管蔡世家註

穆姬者秦穆公之夫人晉獻公之女晉惠公立使納羣
公子曰公族者君之根本秦與晉戰獲晉侯以歸穆

姬聞之乃與太子瑩公子弘女簡璧衰絰履薪以迎
且告穆公曰上天降災使兩君匪以玉帛相見乃以
興戎婢子娣姒不能相教以辱君命晉君朝以入婢
子夕以死惟君其圖之公懼乃舍諸靈臺

列女傳

伯嬴者秦穆公之女楚平王夫人昭王之母也吳入郢
昭王亡吳王闔閭盡妻其後宮次至伯嬴伯嬴持刀
曰妾聞生而辱不若死而榮妾以死守不敢承命吳
王退舍伯嬴與其保阿背永巷之門皆不釋兵三旬

秦救至昭王復君子謂伯羸勇而精一

列女傳

秦

孟姜同官人適范植僅三日植赴役長城姜送寒衣至城下植已死姜尋夫骨無辨嚙指血驗得之

郡國志

負

遺骸歸至祔棚道中山巔渴甚號哭山忽出泉因名曰哭泉在今同官城北未幾死西山石穴中邑人憐之并其夫遺骸偕葬有祠墓側

馬志

漢

隨清娛太史司馬遷侍妾趙之平原人年十七事遷會
遷有事去京縞居於同後遷故亦憂傷尋故

褚遂良
撰隨清

娛墓
誌銘

楊敞夫人敞華陰人昌邑王淫亂大將軍光與車騎將
軍張安世謀廢王更立議既定使大司農田延年報
敞敞驚懼不知所言延年起至更衣敞夫人遽從東
廂謂敞曰此國大事今大將軍議已定使九卿來報
君侯君侯不疾應與大將軍同心猶豫無決先事誅

矣延年從更衣還敬夫人與延年參語許諾請奉大將軍教令遂共廢昌邑王立宣帝

前漢書楊敞傳按敬夫人司馬遷

之女龍門人

節女者長安大昌里人妻其夫有仇人欲報而無道徑聞其妻仁孝有義乃劫其妻之父使要其女為中訶父以告女女計念不聽則殺父不孝聽之則殺夫不義不孝不義皆不可行於世欲以身當之乃佯許諾曰旦日在樓上新沐東首卧則是矣請開戶牖待之

乃告其夫使卧他所因自沐居樓上東首開戶而卧
夜半仇家果至斷頭持去明而視之乃其妻之頭也
仇人哀之以為有義遂釋不殺其夫

列女傳

賈逵姊平陵人逵年五歲明慧過人其姊韓瑤之婦嫁
瑤無嗣而歸居焉亦以貞明見稱聞里中讀書旦夕
抱達隔離而聽之逵靜聽不言姊以為喜至年十歲
乃暗誦六經曰憶昔姊抱達於籬間聽隣家讀書今
萬不遺一

拾遺記

班昭扶風曹世叔妻同郡班彪之女昭字惠班一名姬
博學高才世叔早卒有節行法度兄固著漢書未竟
而卒和帝詔就東觀踵成之數召入宮令皇后諸貴
人師事焉號曰大家鄧太后臨朝與聞政事以出入
之勤特封子成關中侯時漢書始出多未能通者同
郡馬融伏於閣下從昭受讀作女誡七篇馬融善之
令妻女習焉昭女妹曹豐生註昭婿之妹也亦有才慧為書
以難之辭有可觀年七十餘卒皇太后素服舉哀使

者監護喪事所著賦頌銘誄問注哀辭書論上疏遺
令凡十六篇子婦丁氏為撰集之作大家讚焉

後漢書列

女傳

孟光扶風平陵孟氏女肥醜而黑力能舉石白擇對不
嫁至年三十父母問其故曰欲得賢如梁伯鸞者鴻
聞而聘之始以裝飾入門七日而鴻不答光乃跪請
牀下鴻曰我欲裘褐之人可與偕隱者耳光曰以觀
夫子之志耳妾自有隱居之服乃更為椎髻布衣操

作而前鴻喜曰此真梁鴻妻也能奉我矣字之曰德
曜名孟光共入霸陵山中以耕織為業咏詩彈琴以
自娛東出關過京師至吳依臯伯通居廡下為人賃
舂每歸光為具食不敢於鴻前仰視舉案齊眉伯通
異之乃舍之於家鴻疾卒葬畢歸扶風

後漢書
梁鴻傳

馬倫汝南袁隗妻扶風馬融之女也字倫少有才辯融
家世豐豪裝遣甚盛隗問之曰婦奉箕帚而已何乃
過珍麗乎對曰慈親垂愛不敢逆命君若欲慕鮑宣

梁鴻之高者妾亦請從少君孟光之事矣隗既寵貴當時倫亦有名於世年六十餘卒倫妹芝亦有才義少喪親長而追感乃作申情賦云

後漢書
列女傳

友娣邵陽任延壽之妻字季兒兄季宗與延壽爭葬父事延壽與其友田建陰殺季宗建獨坐死延壽會赦乃以告季兒季兒曰殺夫不義事兄之仇亦不義與子同枕席而殺吾兄又縱兄之仇何面目以生而戴天履地乎乃告其大女曰汝父殺吾兄義不可以留

又終不復嫁矣吾去汝善視汝兩弟遂自經而死馮

翊王讓聞之令縣復其三子而表其墓

後漢書
列女傳

穆姜漢中陳文矩妻同郡李法姊字穆姜有二男而前妻四子文矩為安眾令喪於官四子以母非所生憎毀日積而穆姜慈愛溫仁撫字益隆衣食資供皆兼倍所生長子興遇疾困篤親調藥膳恩情篤密興疾久乃瘳於是將三弟詣南鄭獄陳母之德狀已之過乞就刑辟縣言之於郡郡守表異其母蠲除家徭遣

散四子許以修革自後訓導愈明並為良士穆姜年八十餘卒臨終勅諸子曰吾弟伯度智達士也所論薄葬其義至矣又臨亡遺令賢聖法也今汝曹遵承

勿與俗同增吾之累諸子奉行焉

後漢書列女傳按穆姜漢中士女

志作安衆令程祇妻今從後漢書

秦瑛南鄭楊相妻大鴻臚劉巨公女也有四男二女相亡教訓六子動有法矩長子元珍出行醉母十日不見之曰我在汝尚如此我亡何以帥羣弟子元珍叩

頭謝過次子仲珍白母請客既至無賢者母怒責之
仲珍乃革行交友賢人兄弟為名士泰瑛之教流於
三世四子才官隆於先人故時人為語曰三苗止四

珍復起

漢中士
女志

杜泰姬南鄭人趙宣妻也生七男七女若元珪稚珪有
望五人皆令德其教男也曰中人情性可上下也昔
西門豹佩帶以自寬宓子賤帶弦以自急故能改身
之恒為天下名士戒諸女及婦曰吾之孕身在乎正

順及其生也恩自于撫愛其長之也威儀以先後之
體貌以左右之恭敬以監臨之懃恪以勸之孝順以
內之忠信以發之是以皆成而無不善汝曹庶幾勿
忘吾法也後七子皆辟命察舉牧州守郡而漢中太
守南鄭令多與七子同歲季考上計無不修敬奉姬

執子孫禮

漢中士
女志

李文姬南鄭趙伯瑛妻太尉李固女賢而有智聞固免
密與二兄謀豫藏弟燮託言還京師有頃難作下郡

收固二子二兄受害文姬乃告父門生王成曰君執義先人有古人之節今委君以六尺之孤李氏存滅其在此矣成感其義乃將變乘江東下入徐州界內令變姓名為酒家傭而成賣卜於市陰相往來十餘年間變遇赦還

後漢李固傳

韓樹南南鄭人趙子賤妻也子賤初為郡功曹李固之誅二子託服藥死具棺器欲因出逃子賤畏法敕更驗實就殺之及固小子變得還子賤慮變報仇賃人

刺之變覺告郡殺子賤初樹南諫子賤子賤不從及
臨死許共并命兄弟嫂侍婢視守之經百餘日乃怠
曰兄嫂念一死萬不得生不敢復圖死也上下以為

信然無幾時於幕下自殺

漢中士
女志

禮珪城固陳省妻也楊元珍之女生二男長娶張度遼
女惠英少娶荀氏皆貴家豪富禮珪敕二婦曰吾先
姑母師也常言聖賢必勞民者使之思善不勞則逸
逸則不才吾家不為貧也所以粗食給吾者使知苦

難耳二婦再拜奉教從孫奉上微慢珪抑絕之感悟
革行遭亂流行宗表欲見之必自嚴飾從子孫侍婢
乃引見之曰此先姑法也四時祭禮自親養牲釀酒
曰夫祭禮之尊也年八十九卒惠英亦有淑訓母師
之行者也

漢中士
女志

陳順謙城固人適鄧令曹寧十九寡居長育遺孤八十
餘卒兄弟陳規著書嘆述之惠謙適張亮則在扶風
官下吏白欲重禁嚴防以肅非元修訪於惠謙惠謙

曰恢弘德教養廉免耻五刑三千蓋亦多矣又何加也兄弟伯思學仙道惠謙戒之曰君子疾歿世名不稱不患年不長也且夫神仙愚惑如繫風捕影非可得也伯思乃止陳伯臺稱云女尚書之後耳

漢中士女志

禮修趙嵩妻張氏女也姑酷惡無道遇之不以禮修終無愠色及寧父母父母問之但引咎不道姑卒感悟更慈愛之鄉人相訓曰作婦不當如趙伯高婦乎使惡姑知變可謂婦師矣後姑病女來省疾姑却之曰

我死固當絕於賢婦手中後遭米賊嵩死乃碧塗面
亂首懷刀託言病賊不逼也養遺生女依父叔立義

終身者也

漢中士
女志

蘇伯玉妻作盤中詩寄夫云姓者蘇字伯玉家住長安

身在蜀

漢詩
評

晉

嚴氏杜有道妻字憲京兆人貞淑有識量年十三適杜
氏十八而嫁居子植女韡並孤藐憲誓不改節撫育

二子教以禮度植遂顯名於時韡亦有淑德傳立求
為繼室憲許之時立與何晏鄧颺不睦晏等每欲害
之憲曰晏等驕侈必當自敗司馬太傅獸睡耳尋晏
等果為宣帝所誅元前妻子成年六歲隨其繼母省
憲謂咸曰汝千里駒也必當遠至以其妹之女妻之
咸後有名於海內其知人之鑒如此年六十六而卒

晉書列
女傳

蘇氏竇滔妻武功人陳留令蘇道賢之第三女也名蕙

字若蘭善屬文智識精明儀容妙麗年十六歸於滔
滔甚敬之苻堅時滔為秦州刺史被徙流沙蘇氏思

之因織錦為迴文詞

十六國春秋本傳

張氏苻堅妾不知何許人明辨有才識堅將寇江左羣
臣切諫不從張氏進曰妾聞聖王之馭天下有因成
無因敗今朝臣上下皆言不可陛下復何所因也妾
聞人君有伐國之志者必上觀乾象下採衆祥天道
崇遠非妾所知以人事言之未見其可秋冬已來每

夜犬嗥雞鳴廐馬驚逸武庫兵器作聲吉凶有兆願
陛下詳而思之堅興兵張氏請從堅果大敗於壽春

張氏乃自殺

晉書列女傳

楊氏苻丕妻征東左司馬楊膺之妹慕容永殺丕以楊
氏為上夫人楊氏不從引劒刺永為永所殺

十六國春秋

毛氏苻登妻武都人河州牧毛興之女美而勇壯善騎
射登為姚萇所襲營壘既陷毛氏猶彎弓跨馬率壯
士數百與萇交戰殺賊七百餘人眾寡不敵為萇所

執萇欲納之毛氏罵曰吾天子皇后安肯為賊羌所辱何不速殺我因仰天大哭曰姚萇無道先害天子今又欲辱皇后皇天后土寧汝容乎萇怒殺之

十六國春秋

秋

裴氏杜乂妻嫠居養后以禮自防甚有德音裴氏壽考

百姓號曰杜姥

晉書杜乂傳杜乂杜陵人成恭皇后父

楊氏呂纂妻弘農人美艷有義烈纂被呂超殺楊氏與侍婢十數人殯纂於城西將出宮超慮齎珍物出外

使搜之楊氏厲聲曰爾兄弟不能和睦手足相屠我
旦夕死人何用金寶超又問王璽所在楊氏怒曰盡
毀之矣超將妻之謂其父桓曰后若自殺禍及卿宗
桓以告楊氏楊氏曰大人賣女於氏以圖富貴一之
已甚其可再乎遂自殺晉書列女傳

梁

王整姊霸城人嫁為衛敬瑜妻年十六而敬瑜亡父母
舅姑咸欲嫁之誓而不許乃截耳置盤中為誓乃止

遂手為亡婿種樹株墓前柏樹忽成連理一年許還
復分散所住戶有燕巢常雙飛來去後忽孤飛女感
其偏棲乃以纓繫脚為誌後歲果復來猶帶前縷雍
州刺史西昌侯藻嘉其美節乃起樓於門題曰貞義

衛婦之閭

南史列女傳

北魏

趙氏武功縣孫道溫妻万俟醜奴圍岐州久之無援趙
謂城中婦女曰州城方陷義在同憂遂相率負土晝

夜培城城竟免賊

北史列女傳

北齊

夏侯氏皇甫和母漢中人夏侯道遷之女才明有禮則親授和以經書和深沉有雅量尤明禮儀卒濟陰太

守

北齊書皇甫和傳

隋

于氏韓覬妻河南人也字茂德年十四適覬十八覬從軍没于氏哀毀骨立慟感行路每朝夕奠祭皆手自捧

持及免喪其父以其幼少無子欲嫁之誓不許遂以
夫孽子世隆為嗣身自撫育愛同已生訓導有方卒
能成立自孀居以後親族之家絕不往來蔬食布衣
不聽聲樂以此終身隋文帝聞而嘉嘆下詔褒美表
其門閭長安中號為節婦門卒於家

北史列女傳
按于氏夫韓觀

史未註籍但據長安中號為
節婦門一語應是長安人

覃氏上郡鍾氏婦夫死年十八事後姑以孝聞數年間
姑及伯叔皆相繼死覃氏家貧無以葬躬自節儉晝

夜紡績十年而葬八喪為州里所敬文帝聞而賜米

百石表其門閭

北史列女傳

唐

王氏新豐人楊慶妻世充兄之女慶以河間王子為郇王守滎陽陷於世充故世充妻之用為管州刺史太宗攻洛陽慶謀與王歸唐謝曰鄭以我奉箕帚者綴公之心今負恩背義自為身謀可若何至長安則公家婢耳願送我還東都慶不聽王謂左右曰唐勝則

鄭滅鄭安則吾夫死若是生何益乃飲藥死

唐書列女傳

李氏郿人王珪母始珪微時李嘗曰兒必貴然未知所與遊者何如人試與偕來會房元齡杜如晦過其家

李闕大驚敕具酒食喜曰二客公輔才汝貴不疑

唐書

王珪傳

李氏楊三安妻高陵人舅姑亡三安又死子幼孤窶晝田夜紡凡三年葬舅姑及夫兄弟凡七喪遠近嗟涕太宗聞而異之賜帛三百段遣州縣存問免其徭役

唐書列女傳 按冊
府元龜作涇陽人

上官氏楚王靈龜妃下邳士族也靈龜出繼哀王後而
舅姑在妃朝夕侍奉謹甚凡珍美非經獻不先嘗靈
龜卒將葬前妃無近族議者欲不舉妃曰逝者有知
魂可無託乎乃備禮合葬聞者嘉歎喪除兄弟共諭
妃少又無子可不有行泣曰丈夫以義婦人以節我
未能殉溝壑尚可御粧澤祭他胙乎將自劓則衆遂

不敢強

唐書列
女傳

劉氏涇陽人田伯明之母伯明少孤劉氏年十九而孀居操行貞固撫育伯明恩義甚篤及劉以壽終伯

明廬於墓側

冊府元龜

姚女澄城人嫂李氏不得於姑每鞭笞輒以自蔽將適人忽危坐而逝嫂亦慟哭死里中立祠祀焉

賈志

王氏楊紹宗妻華陰人在祿而母亡繼母鞠愛父征遼歿繼母又卒王年十五乃舉二母柩而立父像招魂

以葬廬墓左永徽中詔賜物段并粟以闕表門

唐書列女

傳

韋氏雍州司法參軍楊諲故妻鄜州刺史吉甫之女其父初嬰疾累月不解衣而寢及父卒一慟而絕帝嘉其至行儀鳳三年特賜縑帛仍令編入國史

冊府元龜

范氏宜君人夫死不嫁事姑孝姑患病久不痊忽聞肉香欲食甚急氏割左膊肉深至骨以奉姑病隨愈事

聞旌表鄉人以割骨名村

馬志

秦氏高叡妻叡為趙州刺史默啜攻州陷示以寶帶異

袍曰降我賜爾官不降自死獻視秦秦曰君受天子
恩當以死報賊一品官安足榮自是皆瞋目不語默

啜知不可屈乃殺之

唐書列女傳
按高獻萬年人

殷氏顏真卿長安人少孤母殷躬加訓導

唐書顏
真卿傳

紹蘭長安民郭行先女適巨商任宗為賈於湘中數年
音信不達紹蘭見雙燕戲於梁間長吁淚下語燕欲
憑附書於壻燕子飛鳴上下似有所諾遂飛泊膝上
蘭乃吟詩小書其字繫於燕足燕遂飛鳴而去任宗

時在荊州忽見一燕飛鳴泊於肩上見有書繫足上解而視之乃妻所寄也宗感而泣下遂歸首出詩示

蘭後張說傳其事

開元天寶遺事

董氏金城女家無兄弟孝養不嫁父亡廬於墓側凡六

載天寶四載二月表其門閭賜以粟帛

冊府元龜

韓氏柳公綽妻公綽華原人氏韓臯女也善訓子仲郢

幼嗜學嘗和熊膽丸使夜咀嚙以助勤

唐書柳公綽傳

竇氏奉天縣人竇氏二女伯娘仲娘幼有志操住邠州

接界永泰中草賊數千人入村行劫聞二女有容色
姊年十九妹年十六藏於巖窟間賊徒擬為污辱乃
先曳伯娘出行數十步又曳仲娘出賊相顧自慰行
臨深谷伯娘曰我豈受賊污乃投於谷賊方驚駭仲
娘又投於谷谷深數百尺姊尋卒仲娘脚折首破血
流被體氣絕良久而蘇賊義之而去京兆尹第五琦
感其貞烈奏之詔旌表門閭仍長免丁役二女塋事
官給京兆戶曹陸海首賦詩以美之

舊唐書
列女傳

王霞卿藍田人才華清膽節行尤高進士鄭殷爨旅於
會稽寓唐安寺樓見壁間霞卿題詩云云霞卿乃邑
宰韓嵩姬自京師挈之任所嵩遇寇而卒鄭子往謁
霞卿辭疾不見令輕綃持詩贈之詩曰君是烟霄折
桂身聖朝方切諮良臣正堪西上投知己何必留程
見婦人鄭得詩慚而去

侍兒小
名錄

長孫氏楊收母馮翊人七歲而孤母親授經十三通大

義號神童

唐書楊
收傳

鄭氏第五峯長安人婦鄭以孝著表闕於門

唐書第五琦傳

常溫女歸薛蒙工屬文續曹大家女訓行於世

唐書常溫傳

溫杜陵人

碧玉右司郎中馮翊喬知之妾曰碧玉武承嗣借以教諸姬遂留不還知之作綠珠怨詩以寄之碧玉赴井

死

侍兒小名錄

封絢殷保晦妻封敖孫也名絢字景文能文章草隸保晦歷校書郎黃巢入長安共匿蘭陵里明日保晦逃

賊悅封色欲取之固拒賊誘說萬詞不答賊怒勃然
曰從則生不然正膏我劍封罵曰我公卿子守正而
死猶生也終不辱逆賊手遂遇害保晦歸左右曰夫
人死矣保晦號而絕

唐書列女傳

賀若婦藍田人姑有疾刲股肉奉姑疾遂愈府縣以聞
勅旌表閭名其鄉曰節婦鄉

藍田志

五代

貞女失其姓鳳縣人五代時為梁將所得義不受辱梁

將亦不敢犯及卒葬於縣北名貞女墓後漢王仁裕

為撰墓碑

明一統志

宋

种放母放父訓長安主簿卒母與放隱終南山豹林谷
之東明峯結草為廬僅庇風雨母樂道薄滋味淳化
三年詔召放母恚曰嘗勸汝勿聚徒講學身既隱矣
何用文為果為人知而不得安處我將棄汝深入窮
山矣放稱疾不起母令取其筆硯焚之與放轉居窮

僻人跡罕至太宗嘉其節詔賜緡錢使養母不奪其

志

宋史種放傳

馬氏下邳李好義妻好義為興州正將吳曦反將攻之
拜決於家廟囑馬氏曰當自為計生死從此決矣馬
氏叱之曰汝為朝廷誅賊何以家為我決不辱李氏
門戶馬氏之母亦曰行矣勉之汝兄弟生為壯夫死
為英鬼好義喜曰婦人女子尚念朝廷我輩當如何

續文獻
通考

孟氏延安人父戍永樂城夏人攻城陷之父死孟呼號
徒步亟入城中獲父屍大慟而斃夏人憐之并其父

葬焉

續文獻
通考

張伯威妹大安軍人嫁崔均其姑王疾妹剔左臂肉作
粥以進達旦即愈知大安軍羅植即崔均所居立孝

婦坊事聞詔賜束帛

宋史張
伯威傳

李氏清澗人顯忠族妹顯忠南歸家屬悉遇害李氏國
色金人欲私之不從乃縛手樹下命左右射其臍遂

罵賊不已而死

明一統志

韓蘄王夫人本娼也嘗五更入府伺候賀朔忽於廟柱下見一虎蹲卧鼻息齁齁驚駭亟走出已而人至者衆復往視之乃一卒也因蹴之起問其姓名為韓世忠心異之密告其母謂卒定非凡人乃邀至其家資以金帛約為夫婦蘄王後立殊功為中興名將封兩國夫人蘄王嘗邀烏珠於黃天蕩幾成擒一夕鑿河遁去夫人奏疏言世忠失機縱敵乞加罪責舉朝為

之動色其明智英偉類此

鶴林
玉露

張姓處子平涼人宋末饑荒就食於汧父母許字於丁
姓後還里復許於富族處子號泣欲死其兄嫂憐之
夜駕車奔汧適丁姓因事他往處子勢不能追又不
敢歸遂自刃焉血痕化為石魚汧人為立廟

忠孝
錄

金

王氏涇陽人進士武師古妻師古早卒氏守節奉舅姑

如初後旌其門

續文獻
通考

史氏李文妻白水人夫亡服闋誓死弗嫁父強取之歸許邑人姚乙為妻史氏不聽姚訴之官被逮遂自縊

死詔有司致祭其墓

金史列傳

師氏適澄城雷氏至二十四歲未有子而夫亡誓不再嫁篤養舅姑姑病革潛割股肉雜飲食以進姑病乃瘥後舅姑俱逝又二十餘年其兄師達欲利其產私許楊珍婚訟於官氏度其難免投井而死明昌三年

采訪使以事聞特旌貞潔

續文獻通考

劉氏許古妻定海軍節度使仲洙女也貞祐初古挈家
僑居蒲城後留劉氏母子於蒲仕於朝既而兵圍蒲
劉謂二女曰汝父在朝而兵勢如此事不可保若城
破被驅一為所污奈何不若俱死以自全已而攻城
益急於是劉氏與二女相繼自盡有司以聞於朝四
年五月追封劉氏為郡君諡曰貞潔其長女諡曰定
姜次肅姜以其事付史館

金史列
女傳

康住住鄜州人夫早亡服闋父取之歸家許嚴沂為妻

康氏誓死弗聽欲還夫家不可得乃投崖而死詔有

司致祭其墓

金史列女傳

馮妙真適進士張慥興定五年慥為洛川主簿元兵入
廊延守臣以西路輸芻粟不時至檄慥詣平涼督慥
欲偕妙真以往妙真辭曰舅姑老矣子行妾留奉養
洛川破妙真從舅姑匿窟室兵索得之妙真泣與舅
姑訣曰婦生不辰不得終執箕帚義不從辱即攜三
子赴井中明年慥歸發井得屍殯於縣之東郭外死

時年二十四

金史列女傳

蒲察氏字明秀鄜州人訥申之女完顏長樂之妻也哀宗遷歸德以長樂為總領將兵扈從長樂一子在幼出妻柴氏所生也明秀撫育如已出崔立之變驅從官妻子於省中蒲察氏聞以幼子付婢僕且與之金幣親具衣棺祭物與家人訣曰崔立不道強人妻女兵在城下吾何所逃惟一死不負吾夫耳汝等惟善

養幼子遂自縊而死時年二十七

金史列女傳

元

程鵬舉妻鵬舉在宋季被虜於興元張萬戶家為奴以虜到宦家女某氏妻之既婚三日即竊謂其夫曰觀君才貌非久在人後者何不為去計而甘心於此乎夫疑其試已也訴於張張命箠之越三日復告夫愈疑又訴於張張命出之遂鬻於市人家妻臨行以所穿綉鞋一易程一履泣而曰期執此相見矣程感悟奔歸宋以蔭補官元統一海內程為陝西行省叅知

政事自與妻別三十餘年義其為人未嘗再娶至是遣人攜向之鞋往興元訪求之城南某菴中氏已為尼旋報程移文本省遣使檄興元路官為具禮委幙屬李克復防護車輿至陝重為夫婦

續文獻通考

楊氏安西人少寡守志割體肉療姑病

元史列女傳

崔氏奉元李郁妻有志節至順元年旌其門

元史文宗本紀

王氏李安道妻咸寧人年十九安道卒氏躬紡織事舅

姑守節終身至正元年旌表

續文獻通考

楊氏鄆縣人閻禎妻禎卒楊甫二十二歲誓志守節五

十年至正元年詔旌表其門

續文獻
通考

劉氏張訥妻藍田人訥為監察御史早卒劉守志不二

河東受兵劉氏二子衡衍俱以事出外度不能自脫

遂與二婦孫氏姚氏決死盡發貲囊分給家人姑婦

同縊焉

元史列
女傳

李氏涇陽人符文進妻年二十六文進卒誓不再嫁紡

績撫子守節終身至元中詔旌其門

續文獻
通考

焦氏涇陽袁天祐妻天祐祖父始皆從軍役祖母楊氏
母崔氏並家居守志至元中天佑從征死甘州焦氏
年少宗族欲改嫁之焦氏哭曰袁氏不幸三世早寡
自祖姑以來皆守節義豈可至吾而遂廢乎吾生為
袁氏婦死則葬袁氏土爾終不能改容事他人也衆
不敢復言又周氏澤州人嫁為安西張興祖妻年二
十四興祖歿舅姑欲使再適周氏弗從曰妾家祖父
皆早世妾祖母妾母並以貞操聞妾或中道易節是

忘故夫而辱先人也夫忘故夫不義辱先人不孝不孝不義妾不為也遂嫠居三十年奉舅姑生事死葬無違禮其父與外祖皆無後葬祭之禮亦周氏主之

有司以聞並賜旌異

元史列女傳

劉氏涇陽吳君錫妻夫亡貽語許更事以圖衣食劉氏誓死不從亂命夫亡後杜門不出甘貧守志以紡織為生三歷饑饉人相食劉氏草蔬木皮以度殘年終

不失節

馬志

周氏涇陽人周氏適張李氏適吳王氏適朱賈氏適蔡
俱元朝已旌表者見雲陽舊志其詳無可考

馬志

王氏幼適涇陽馮氏生一子守義不渝或有人勸別圖

者王氏怒之再莫敢言者經天厯至正間處之恬然

年九十有六聰明康健齒落更生

馬志

楊氏適李又楊氏適李二李父子也二楊姑婦也其家

義方教子姑婦繼踵而全節兄弟同心而致孝二楊

俱夫亡守節事聞旌表名士書其門曰貞節邑官改

里西城街曰重節街

馬志

孫氏三原張德妻德亡孫年二十四誓死靡他子世享

亦早卒妻王氏年二十九亦誓不再嫁世享子忠亦

早卒妻劉氏年二十八亦能守義不渝事聞詔旌表

其門

續文獻
通考

李氏孫福妻扶風人夫亡守節延祐二年旌表明初猶

存

賈志

蒙氏雷沂妻同州人沂歿於軍氏孀居三十年事舅姑

撫孤幼以節孝著聞至元中詔旌其門

賈志

王氏馬宅妻朝邑人宅卒氏年十九守節延祐元年旌

表

賈志

陳氏韓城人適邑人孫謙生子景仁甫一歲而謙卒氏

方十九誓不易節至元十六年旌其門

續文獻通考

李氏王懋德妻華陰人李克忠女年十八適懋德未踰

年夫亡人以少艾爭娶之李剪髮自誓元季兵亂攜

嗣子入華山張超谷以避難事定乃歸人奇其節洪

武八年旌表

馬志

張氏党通妻蒲城人通亡氏年二十五孝親撫孤終身

不貳延祐五年旌表

馬志

井氏任輝妻蒲城人輝卒氏年二十一守節事姑育子

孝慈兼盡年九十餘卒延祐五年旌表

馬志

劉氏耀州李子和妻夫年十九死氏誓不再嫁至大元

年旌表其門事姑極孝後名其里曰孝姑里

續文獻通考

郝氏永壽人田大妻胥氏田二妻周氏田三妻兄弟三

人俱死於兵郝年二十胥年十九周年十八俱堅心

守節終身不嫁延祐二年旌表

續文獻
通考

任氏邠州人氏一家三婦俱少寡誓不他適戮力蠶桑

以奉舅姑事聞並命旌表

續文獻
通考

關氏鄜州人孫世昌妻年二十三世昌卒守志不渝六

十年延祐中旌表

續文獻
通考

王氏鄜州康德明妻年二十而德明卒半月生遺腹子

撫孤守節至正中旌表

續文獻
通考

党氏中部王仲泰妻元統間夫卒氏年十八守節五十

五年

賈志

張氏洛川人賀敏妻年二十四敏病篤謂張曰我若不

諱汝年少無子可更適人張泣以死自誓敏尋卒張

即自縊

明一統志

明

王氏秦愍王妃洪武中以死殉諡愍烈

續文獻通考

盧氏咸寧毛士謙妻二十八而寡守節四十年洪武時

旌表

馬志

石氏渭南譚五妻年十七適五踰年五卒遺腹生子舅姑憫其少貧命他適氏不從晝夜緝績孝養舅姑洪

武十六年旌表

渭南志

左氏渭南王卞妻卞亡氏年二十六舅姑老且病氏紡績奉養後舅姑相繼亡以禮合葬鄉里稱其節孝洪

武十七年旌表

馬志

曹氏甘泉許舒妻年十九而寡守節撫孤洪武十八年

旌表

甘泉志

卜氏略陽人夫姓名失傳洪武初夫死守節建坊表墓

略陽

志

周氏鳳翔焦文友妻夫亡撫遺腹子苦節自守洪武十

七年旌表

賈志

師氏朝邑張三妻年十九夫亡守節織紡以奉舅姑洪

武中旌表

賈志

王氏梁孝恭妻澄城人年二十生一子而夫亡奉姑育

子更元季兵亂節不少易卒年六十七洪武九年旌

表

馬志

陳氏韓城楊庸妻年二十一而寡奉舅姑甚孝舅歿祭

葬以禮姑瞽侍奉益勤洪武二十七年旌表

馬志

馬氏孫直甫妻尚氏李琳妻俱蒲城人馬年二十七而

寡尚年二十四而寡俱守節撫孤終身不二馬於洪

武中旌表尚於弘治時旌表

蒲城志

李氏白水江四妻夫亡年二十五守節不二洪武二十

五年旌表

賈志

康氏賀谷榮妻鄜州人夫亡年二十五苦節撫孤父逼

令改適投崖死洪武十八年旌表

鄜州志

趙氏張敏道妻洛川人名金定年二十夫卒自縊以殉

同里李從義妻張氏名金香年十七夫卒守節以奉

舅姑洪武中俱旌表

馬志

張氏中部任弘異妻夫死一子甫十歲張撫之躬親耘

耨守節三十餘年有弋貞碑記其事

中部志

田氏宜君甯琮妻琮中鄉試入監卒於京氏年二十四

扶襯歸葬撫孤守志洪武中旌表

宜君志

張氏臨潼張錦女適高陵王九成年二十而寡又張氏
高陵吳仁妻亦年二十而寡孝親撫子守節終身永

樂五年旌表

賈志

某氏翰林程濟妻朝邑人濟教諭岳池以熒惑守心將
疏論之氏諫曰天道渺茫君非司天奈何越職言事
濟卒言之逮繫廷訊妻亦隨至京後金川門破濟從

亡氏自縊死

朝邑志

王蘭兒蒲城人永樂間隨母育於井姓者井欲以妻已

子蘭兒執禮投泉泉為之涸

蒲城志

劉氏西安衛千戶劉鉞女副使馬應祥妾也應祥病亡

氏自縊死

馬志

曹氏西安左衛進士周鉞妻鉞知輝縣舟次直沽溺水

死氏欲投河以殉家人密防之不得遂乃斷髮守節

事舅姑以孝聞後膺旌典

馮志

甄氏咸寧王彥中妻年十七夫亡勵志撫孤宣德中旌

表

賈志

王氏長武魚志敏妻志敏亡氏不食死邑令周良士扁

其門

長武志

田氏宜君賀恩妻恩病篤氏毀容侍湯藥晝夜不懈及
卒自縊以殉又同邑王氏夫死於烈火自刎而死俱

旌表

宜君志

樊氏藍田李壽妻夫亡年二十一守節撫子正統二年

旌表

藍田志

張氏涇陽李秉妻年二十而寡守節撫子孝事舅姑正

統時旌表

賈志

陳氏膚施人指揮王敏之妻夫亡自縊時年二十正統

中旌表又同里陸立望妻張氏年二十而寡撫孤守

志吳著妻董氏夫亡無子守節終身張於正統時旌

表董於弘治時旌表

延安府志

張氏鳳翔劉榮妻年二十夫故守節撫子正統中旌表

鳳翔
志

曹氏岐山李賜妻年二十四守節教子俊官叅政正統

時旌表

馬志

趙氏郃陽李十一妻夫亡守節又輸粟賑饑正統時旌

表

郃陽志

梁氏洪洞主簿李官妻華州人夫卒氏年二十四守節
八十三歲卒同邑兵科給事中董思恭妻姜氏亦以

守節稱正統中俱旌表

馮志

時氏綏德王淑妻淑為寧夏守備戰歿氏自縊死宣德九年旌表淑從孫敏妻趙氏夫亡亦自縊正統六年

旌表

綏德州志

陳氏郝郁妻綏德人年二十夫亡守志孝親撫子正統

五年旌表

賈志

柏氏延安衛指揮時清妻清陣亡氏年十八無子守節

卒年八十三後旌表清弟源妻張氏米脂序班某女

母亡痛哭出血而死

延綏志

董氏長安縣民妻夫亡事親鞠子誓不二事景泰中旌

表

馬志

董氏咸陽趙潤妻潤亡守節景泰五年旌表

咸陽志

陳氏臨潼尚書呂震妾年二十震卒守節五十餘年景

泰旌表

馬志

田氏藍田兀雲妻雲亡氏年二十深處閨閣至親罕見

其面常懸一鈴於門楣遇人至即避之其守身嚴謹

類此景泰中旌表

藍田志

吳氏仇秉陵妻費氏張翼軫妻皆三原人吳年二十六而寡費年二十五而寡俱奉姑育子誓不他適吳氏景泰時旌表費氏成化時旌表又王仲禮妻任氏夫亡年二十四守節四十年

三原志

許氏扶風李實妻夫亡事親至孝守節三十年景泰二

年旌表

賈志

暢氏王瓚妻王氏安志和妻俱乾州人暢年二十夫亡無子守節終身王年二十七夫亡子幼守節至七十

歲景泰時同旌

乾州志

孫氏咸寧趙聚妻年二十六守節孝親育子天順時旌

表

咸寧志

趙氏南鄭李原妻年二十二而寡守節撫孤卒年八十

有四

漢中志

劉氏城固湯銘妻銘亡氏年十九撫一歲子成立守節

六十三年

馬志

任氏商州苟琬妻年十七夫亡守節四十年天順間旌

表

商州志

趙氏同州王琛妻琛早逝氏撫孤守節天順間旌表

同州

志

趙孟英長安人許字王敷典未婚敷典沒英同母往弔

觸棺而死

賈志

蔚氏長安王恭妻劉氏張進妻蔚年二十八而寡劉年

二十六而寡俱守節終身成化二年旌表

長安志

朱氏咸寧舉人趙端妻年二十二而寡養親撫孤成化

時旌表

賈志

宋氏咸寧人適歸德趙琳琳赴京暴得狂疾夜乘馬去
家人物色無所得筮之曰死矣氏為位發喪以其衣
冠葬焉時年十九一子甫晬餘氏誓與兒為存亡姑
老病疽氏日一舐濯之竟愈姑死葬稱子事成化丙

戌有司上其節詔旌其門

李東陽集

杜氏咸陽劉五妻年二十守節成化間旌表

馬志按
賈志作長

安人

劉氏富平惠敬妻年二十六而寡躬紡績事親撫子成化四年旌表又張傑妻宋氏夫亡守志事親教子苦

節歷四十年

賈志

史氏潼關吳錦妻年二十八而寡事舅姑執婦道成化

五年旌表

賈志

楊氏藍田李俊妻年十九夫亡翁姑哀其年少竊議更

嫁氏知之欲自縊翁姑聞而止教子廷實任蒿縣訓

導狀上詔旌表之

藍田志

李氏張福妻涇陽人福卒氏年二十三守節四十年以

織紡嫁福三妹撫孤成立又同邑劉釗妻甯氏馬駉

妻趙氏夫亡守節不渝成化中並旌其閭

馬志

王氏三原申瑾妻太宰端毅公恕女弟適瑾後敬事翁姑親操井臼瑾亡九熊課子矢志栢舟三十餘年如

一日兄恕為表其墓

三原志

韓氏舉人靳希顏妻保安人年二十夫亡撫二遺孤苦

節七十年

賈志

馮氏甘泉鄭旻妻夫亡子幼紡績養姑成化時旌表

賈志

劉氏李榮妻保安孝子劉俊之妹年十八適榮甫六月

榮卒氏哀慟欲殉其姑防之密氏婉言寬慰俟姑寢

縊死柩前事聞旌表又同邑王榮妻朱氏亦以守節

旌

馮志

高氏生員楊光諭妻寶雞人氏年二十四夫亡撫孤養

母艱辛備嘗壽七十五成化中旌表

賈志

黃坤貞南鄭林輝祥妻年二十二夫亡撫子惟聽官至

推官次惟惠亦成立年七十終始一節成化中旌

續文

獻通考

紀氏榆林衛生員謝欽妻年十九生子甫三月欽赴鄉試卒於西安氏聞即為同窆計以翁姑嚴備乃止後翁死事姑唐最孝鄉黨師之又監生范宣妻戴氏年二十七夫亡無子孀居五十餘年與紀氏同旌表

延綏

志

周氏靖邊營千戶張鏞妻鏞亡氏年十九子潔方二歲

氏撫之成立七十餘歲卒潔歷官指揮

延綏志

梁氏舊安邊餘丁張紀妻年二十七紀死誓以身殉戚

屬防之甚密越三日竟自縊死事聞表其里宅

延安府志

姚氏王英妻商州人年十九英歿撫其子成立子亦歿

氏與其婦姚氏並寡居後皆旌表

馬志

強氏馮雷妻雒南人雷亡強年二十九撫子仕政成立

娶媳張氏政亦尋卒張年二十遺子甫三歲張欲引

決姑曰乃翁亡時爾夫如爾子歲汝死弱子誰依耶

姑婦同節成化中旌其門

賈志

張氏朝邑韓顯妻邦奇祖母也年二十七顯死守節五十年有司上其事旌表又王享妻靳氏年二十七守

節卒年九十亦旌表

馬志

劉烈女朝邑人也字里舍兒未行而里舍兒死女聞易服不食涕泣請殉乃往就諸卞偉而質焉偉曰子志甚善然太過之行如衆笑何女曰天下之理是而已矣苟心之安何恤於人言乃改女飾易婦容縊而死

焉

范洛集

孔氏華州生員東允妻讀書秉禮允卒守節撫子子亦死偕媳宋氏撫孫宋亦克盡婦道孝事厥姑督學扁其門為節孝雙全又東野妻王氏守節五十餘年有

旌表

賈志

蔡氏石愷妻澄城人愷卒氏年十九生子甫六月時祖父母及孀姑李氏俱年邁氏辛勤孝養孀居五十餘

年成化十八年旌

賈志

張氏邠州劉晰妻劉氏曹剛妻夫亡守節成化時旌表

賈志

劉孝姑中部劉準女準以諸生死非辜女年十六取其書焚且泣曰今若此讀書何為抱父屍而絕有司為

營葬旌表

馮志

程氏党爵妻中部人年十九夫亡撫遺腹子漢漢又早卒與媳王氏同心守節撫孤孫繼芳母道婦儀鄉里

稱焉

賈志

李氏高俊妻綏德人年二十夫亡自縊成化六年旌表

馬志

李氏鄜州王讓妻夫亡守節成化十六年旌表

李氏姜耀妻米脂人耀蚤卒氏無所出舅姑欲嫁之氏

曰家貧親老婦往誰奉起居乎不然從夫久矣善事

舅姑送終盡禮苦守終身有司旌表

賈志

張氏神木張銳妻銳為宣府叅將正統時扈從死於紅

門兒氏年二十三守節撫孤子堅仕至大同總兵

延綏

志

趙氏內江知縣張應登妻咸陽人夫亡守節屢膺優詔
同邑巴縣知縣谷賑妻王氏孀居勵操至八十二卒
生員張英妻杜氏年二十六守志至八十五卒俱於
弘治中旌表又里民魏崇儒妻許氏年十九而寡守

節終身

賈志

王氏藍田李高妻高死氏年十九誓死不嫁後舅姑及
夫弟李田婦劉氏相繼亡遺二弟二姪長者提挈少

者乳抱氏哀毀幾絕盡易釵釧衣物躬親舉葬事寄

居母家以績紉自給悽楚萬狀孀居五十餘年

藍田志

史氏梁茂妻岐山人年二十五茂卒孀居數十年終無異志茂弟倫妻謝氏年二十二倫卒誓不再適並立

坊旌表

馬志

陳氏吳四妻洋縣人夫死於戰氏哀痛自傷足不出戶

者三十年弘治中旌表

賈志

王氏百戶王舉女也適歸德堡韋芳芳亡氏年二十生

一子世江氏日夜號泣將以身殉鄰婦勸以撫孤乃止世江稍長家益貧一日屋舍焚蕩灰中得鎔金一塊鄰里以為烈火真金完節之祥也後世江以軍功晉秩指揮又榆林衛軍郭瑄妻張氏夫陣亡守節四十餘年

延綏志

岳氏戶部主事王璚妻商州人少敏慧通孝經列女傳及唐宋諸詩十七歸璚二十璚亡守節五十餘年病革時猶能遠聽知其所製棺為樟木蓋靜極所致云

弘治中旌表

馬志

薛氏朝邑人夫亡守節弘治中旌表

賈志

王氏澄城鄭伯玉妻年十七適玉生二子俱幼而玉亡
姑魚氏孀居氏承順唯謹成化二十一年大饑有勸
之他適者氏以死自誓苦節四十餘年邑令旌其門

澄城

志

李氏邠州任弘妻馬氏三水生員吳重賢妻俱早年喪

夫零丁孤苦守節終身弘治中旌表

賈志

丁氏鄜州張顏果妻年二十六夫故守節以死自誓年

至八十又生員劉璞妻任氏年二十三而寡守節三

十餘年鄉人稱之

鄜州志

李氏綏德衛千戶王大瀛妻年二十九大瀛死遺八子

俱幼家徒壁立氏守節堅苦督撫院道咸旌其閭後

八子以武起家長曰威任總兵又綏德衛千戶史琅

妻高氏年二十九夫亡守節至七十餘卒

延綏志

高氏父某妻米脂人夫亡氏年十六有遺腹以死自誓

其父以存嗣勸之氏泣而諾後生一子撫育成立苦

節終身

賈志

陶氏李應元妻米脂人應元宦經歷卒陶即自縊死

馮志

郝氏清澗生員張鳳妻年十八張氏舉人王綱妻年二

十二並以夫亡守節教子領鄉薦於弘治中旌表

賈志

郝氏苗實妻清澗人太守郝安女實亡氏年二十子甫

晬餘伯氏欲強嫁之氏斷髮毀面以死自誓享壽八

十一而終

賈志

姬氏生員劉侍妻興平人侍亡有求婚者氏斷髮自誓

後姑病割股和粥以獻官府屢表其門

賈志

張氏臨潼李萬庫妻居西門外暴雨自驪山下廬舍為

圯其翁先登樹垂手挽張張不肯從遂衝激死

賈志

白氏鄭鼎妻高陵人鼎死氏年未三十守志教子子侃

鄉舉官知縣正德中旌表

馬志

王氏朱威妻鄠縣人知縣琰之女十九歸威四年威亡

生一子甫晬姑已先卒舅有側室與其二子甚不惠

共欲嫁焉誘之百方王誓死不易抱哺其子竟至成

立正德二年旌表

馬志

魏氏生員王應元妻鄆縣人元死守志不二其子生員

徵妻高氏以徵病故毀容輟餐日夜悲號成疾歿於

守制之八月年十九官為扁旌曰一門雙節

鄆縣志

張氏三原段顯妻年十九而寡事親孝撫子思明娶婦

孫氏思明及婦又早卒遺孫三人氏紡績撫育成立

苦節四十年王恕溫純俱為撰文勒石

三原志

員氏裴昌妻渭南人氏年二十而寡姑老家貧親鄰勸令改事員以死自誓躬緝績養姑正德十六年旌表

馮志

馬氏張梅妻渭南人梅亡年二十舅姑父母並欲嫁之馬乃泣誓曰我若有他天必殛我若再逼我我亦必死自是無復敢逼者馬孝養舅姑訓女教子內外稱

賢年八十終正德十六年旌表

馬志

郭氏知縣劉廷瑚妻宜川人隨任盧氏值流寇破城同

小姑丁香俱赴井死里民郭景甫妻趙氏夫亡撫幼

子維聘既長遂縊死夫塚上院道旌表

賈志

趙氏宜川張千妻千逝氏年二十無子兄逼之嫁則以

死自矢壽八十二卒院道旌表

賈志 縣志 千作遷

王氏毛雄妻鳳翔人年二十三雄病劇氏籲天祈以身

代雄卒堅志守節躬紡織事舅姑教子嚴而有方孀

居三十一年子驚領薦官知縣正德七年旌表

馬志

馮氏生員何慮妻鳳翔人年二十五慮卒遺孤五歲舅

姑在堂氏紡績供養及歿喪葬如禮教子成立

鳳翔府志

劉氏李惇妻惠氏梁雲鵬妻俱岐山人劉氏孀居苦節教子憲登進士正德中旌表惠氏年二十餘而寡事

孀姑撫幼子慈孝備至年六十餘終

賈志

李氏陳情妻南鄭人正德辛未蜀寇至李從夫避兵至漢江未渡寇忽至其夫與衆驚散氏疑夫死於水遂

抱幼子赴水死

賈志

徐氏榆林衛應襲何承爵妻年十七歸承爵三年而承

爵死遺腹舉一子氏傭紉為事親撫孤資鄉人稱為
何孝婦後數年翁姑相繼亡氏荷土成墳足不出閨
門者三十餘年子成立襲職千戶巡撫李尚智旌之
又榆林衛應襲崔鎮妻文氏年二十六鎮亡子長浩
長性俱幼文撫之成立官俱至叅將又衛應襲梅禎
妻黃氏年二十禎卒勵志守節翁利豪右賂欲奪其
志氏力拒之不克號呼四鄰控於巡撫張縉得以節
終又衛諸生趙鉉妻錢氏鉉死子克紹方四歲錢勵

志撫孤克紹登正德鄉試錢以壽終

延綏志

高氏李承祖妻榆林人父汝梗官薊門副總承祖隨之

官病死高遂自縊薊鎮巡按題請旌表

延綏志按神木志作高

氏李承祖弟李繼祖婦繼祖卒於兄任氏聞而自縊與鎮志微異未知孰是

王氏屠阜民妻興安人年二十五民故乏嗣氏誓死不

食自縊者數次隣婦以翁姑無依勸止紡績事親甘

貧守節五十餘年卒正德中旌表

賈志

翟氏興安張价妾正德中价任孟縣令卒於官氏同嫡

劉氏扶柩回籍葬時自縊以殉時年十八

興安志

王氏生員柏壽妻興安人壽亡氏年二十一家貧甚中外無依氏守節事親有勸令改適者氏斷髮自誓孀居六十餘年疾篤不容醫診視其守身嚴謹類如此

賈志

劉氏梁廷臣妻興安人廷臣故氏年二十一遺二孤在襁褓家貧甚舅姑欲令改適即剪髮毀面以死自誓有豪豎強謀奪節氏執刀刺頸血流滿地舅姑亦為

感泣貞節五十餘年

興安志

王氏戶部主事張鳳翔妻洵陽人鳳翔卒母老子幼氏仰事俯育慈孝備至又同里御史許中妻周氏亦以

守節著聞官俱給廩終身

洵陽志

常氏漢陰溫德潤妻正德末年有謝姓者鬻產得二十金被酒亡失氏拾得之翌日謝酒醒索金不獲欲為

自盡計氏知急取還謝封識如故章丘太常卿李開

先為作還金傳

漢陰志

南氏山陽太學生郭邦屏妻屏卒氏年二十子未週氏抱子泣柩前累年不哀忽有杜鵑拂其首哀啼紅血

旋繞竟日乃去

賈志

劉氏商州貢生王懋德妻夫卒於京氏撫孤守節正德

中旌表

賈志

周氏姚連妻廉氏李吉妻皆澄城人周年二十夫亡零

丁孤苦晝耕夜織孀居五十餘年廉年二十四夫亡

誓不再醮孀居六十年正德中咸加旌獎焉

馬志

高氏宋堯妻華州人堯卒氏年二十服砒霜死堯弟宰
妻東氏年二十五宰卒守節五十二年里人稱為雙

節云

賈志

嚴氏華州生員適遠妻遠卒氏矢志從葬親隣咸以子
幼無托勸之氏曰吾死以明志安知其他遂自縊死

馮志

趙氏姜溢妻蒲城人溢為山陽掾正德戊寅八月賊陷
山陽擊傷溢將掠趙去趙抱溢痛哭罵不絕口遂遇

害溢頃得蘇

馮志

王氏戶部主事李世榮妻乾州人榮卒氏年二十五惟一女屢迫饑寒堅節不渝當道命本州月給廩餼又同邑周氏錦衣衛吳珩妻珩卒於官氏年二十六攜二孤負骸歸葬事姑以孝聞正德時旌

丁氏武功人喬銓妻夫卒無子守節四十年正德八年旌

武功志

王氏長武郭惟通之母二十而寡守節育子終身如一

日邑令馬如蛟旌其門

長武志

郝氏生員劉矯妻清澗人通子史善楷書矯卒氏年二

十七無子以死自誓壽七十三終

賈志

徐氏右護衛百戶吳澣妻徐氏右護衛陳大策妻施氏
生員陳大救妻姚氏韓俱妻皆長安人徐年十七胡
年二十四施年二十六並以貞操著姚奉翁姑孝養
特至子詢始四歲而孤課之登進士嘉靖時詔俱旌

表

賈志

王氏生員顏訓妻長安人訓卒氏絕食死世宗朝旌表

賈志

關氏生員濮仕通妻長安人仕通故氏哀毀骨立見為仕通治槨謂其姑曰大之容兩棺可也伺間自縊死後啟篋見所製衣衾皆兩乃知其志素定云

馬志

梁氏胡廣妻咸寧人廣卒氏年二十一孀居四十二年嘉靖中旌表又馬自高妻周氏夫亡無子守節終身于廣福妻張氏年二十九史炳訓妻李氏年三十皆

以守節稱李壽至七十卒

賈志

沈氏咸陽楊光斗妻年二十四甘貧守節撫孤穉成立
娶閻氏穉又早亡閻守志撫子入鬻序沈壽八十九
閻亦七十卒河東李楷有世節詩序又陳經諒妻武
氏年二十四韓澍妻王氏年二十九俱以守節著聞

咸寧志

常氏咸寧正誼女幼嫻女訓未及笄失怙哀毀幾喪明
適翁氏事舅姑如事父母祖姑高氏少寡守節壽八

十五齒落不能嚙蔬果常每善調甘脆百方頤養高語曰汝孝非尋常所及願汝生好子孫報汝後果衣

冠不絕

咸寧志

葛氏興平生員閭伯仁妻夫喪三子皆諸生相繼殂逝

葛率諸婦守節終身邑令章評表曰一門四節

興平志

陳氏閭臣妻臨潼人臣病死陳悉力營葬事葬時自縊

死

馮志

宋氏臨潼楊斯條繼妻年十四歸斯條甫半載夫亡持

節四十餘年撫前妻子不異所生厥子亦敬事之終

身無間焉

臨潼志

邢氏高陵張得祿妻得祿死河州邢哭幾絕舅姑欲奪其志邢曰婦事二夫禽獸行也使其無子尚不忍為況有孫可守耶後從叔妻龐氏隣人王銳妻宋氏皆以新寡遇荒年不安其室謀諸邢以圖存邢曉之切至龐宋感其言皆守節無二

高陵志

高氏羅季士妻鄠縣人季士知永和縣氏適季士方八

月而季士卒氏苦節二十餘年又里民曹曰龍妻王氏年二十三守節撫孤有求婚者氏持刀攜子以死

自誓當道給糧旌表

賈志

張氏劉和妻韓氏趙玘妻涇陽節婦也張年二十五而寡事姑以孝聞姑歿三日不食孀居五十八年韓氏年二十五守節紡績以事舅姑取木葉野菜以自給孀居四十七年俱旌表

馬志

祈氏王朝妻涇陽人守節撫幼子值歲儉家人私語曰

生之弗謀何節之顧氏初聞痛哭以頭觸柱曰吾忍
死稱未亡人為王氏一由肉耳令吾志不白者吾頭
且與柱碎矣家驚起持止左面青痕終身人謂烈氣
所凝嘉靖二十年旌表

馮志

白氏涇陽舉人張朗妻朗因會試死於途遺子方七月
氏年二十二孝事孀姑撫子成立嘉靖間有司表其
閭又里民何瑚妻宗氏夫亡撫遺腹子成立至七十

一終事聞旌表

涇陽志

何氏涇陽魏潔妻潔遊梁吳間何氏朝夕奉姑趙氏自
上食歲時衣服皆希意先為之後姑老病癰親嘗湯
藥起居扶侍夜即卧榻下如是者二年姑視之猶潔
在也氏善自治生晝夜操作不怠嘉靖三十二年卒
子學曾官至兵部尚書

丘隅集

閻氏涇陽周仁學妻年二十學亡親饋食於穿穴者語
之曰穿必大其壙穿穴者應且笑謂少婦將欲從夫
地下乎葬之先一日自經死

涇陽志

商州民盧清妻韓

氏耀州生員成紹妻安氏俱夫亡製大棺棺成二氏
皆自縊死遂合窆焉

馬志

李氏涇陽呂柟妻事繼姑侯氏甚謹躬操薪水朝夕上
食每恨不及事嫡姑宋氏遇忌辰或悲思泣下翁姑
卒時並哭至痛毀瘠撫叔氏遺孤成立為之娶叔氏
子媳皆母事之壽七十二嘉靖三十三年卒

丘隅集

楊氏涇陽秦某妻關中饑饉盜賊橫肆氏墜樓不死投
井死雷禮吾女年十二避兵於樓從樓見被掠者醜

之墜樓死雷氏適韓某早寡而貧兵至攜孤避樓上樓陷棄孤亦墜樓死又有王三遠為人傭耕其妻兵欲污之給曰閉門投井竟死井中

艾陵文鈔

呂氏三原張鸞妻鸞卒呂年二十撫孤尚永克底成立娶常氏尚永亦早卒姑婦同居邑稱雙節常卒子元琛廬墓三年有司以節孝奏旌表

馬志

王氏名蘭卿本娼家女蓋屋張附翽妾翽為青州府推

官病卒氏服毒以殉

馬志

辛氏王君玉妻任氏何器妻俱罄屋人辛年二十五甘貧守節六十餘年以子貴贈孺人任年二十三苦志

撫孤至九十七終俱旌表

賈志

魏氏罄屋吳鈞雷妻夫死氏年二十二家貧甚織履以自給遺孤增光擇師教之登嘉靖辛酉鄉試為廉吏

何司空表其里曰栢舟媲美又諸生吳養蒙妻何氏

王九功妻趙氏成九叔妻王氏俱無子守節終身

蓋屋

志

李氏張定妻渭南人年二十六定亡無嗣兄嫂納求者
賄誘之百方不能奪氏素孝謹得舅姑心為立嗣終
志及舅姑歿嫂奪其繼嗣備極困辱李志益堅嘉靖

二十二年旌表

馮志

安氏張猷妻渭南人猷亡即自縊以殉嘉靖三十二年

旌表

馮志

杜氏馬璉妻渭南人璉早亡杜營葬畢即自縊

渭南志

竇氏韓能妻惠氏劉五妻仇氏強果妻俱富平人也竇

年二十五而寡事翁姑以孝聞孀居三十八年惠年

二十三守節終身仇夫死無嗣守節至七十餘卒

賈志

楊氏李彥章妻富平人章亡紡績以鞠幼子姑憫其貧

苦勸改節氏不可嘉靖乙卯饑巨室謀娶之氏皆痛

罵慚去鄰婦哀而與食亦不食遂與子並餓死

馮志

常氏延安衛沙繼勲妻勲早亡氏年二十餘刻木於室

事之如生垂四十年

延綏志

渭南王提衡妻張氏夫亡

守節自塑夫像朝夕哭奠鄉里稱焉

渭南志

李氏楊于喬妻膚施人夫亡氏年十八欲以死殉家人密防之成服畢暗入夫書室內自縊死嘉靖中旌表

賈志

李氏焦子學妻延長人夫亡撫孤辛苦萬狀嘉靖中奏

聞建坊又董惟新妻王氏諸生李鏜妻趙氏並以年

幼喪夫撫遺腹子成立而王氏則蒙督學旌表焉

賈志

田氏鳳翔人田璋女適庠生杜文文早逝氏年十六子

孟春甫兩歲教育成立翁姑相繼卒氏竭力以禮殯

葬其兄勸其改適遂終身不登兄門嘉靖中旌其廬

鳳翔
縣志

朱氏副千戶應襲郭文妻鳳翔人年十七夫卒撫子成立子亦早卒媳周氏有遺腹子欲墮之他適朱百方調護郭氏之宗賴以不墜嘉靖中撫按旌表又邑庠生王某妻周氏夫亡守志撫子應元方二歲後以子

貴贈孺人

鳳翔
府志

劉氏鳳翔民李正芳妻年二十九守節奉姑姑病篤氏

焚香默禱願以身代姑尋愈人以為孝感所致事聞

旌表

鳳翔府志

李氏岐山楊桂繼妻桂前娶生子三歲氏生子甫六月

桂卒氏年二十四家計貧苦紡績自給撫二孤成立

人皆不知為異出壽八十卒

岐山志

雙烈女者扶風張文玘之女文玘三女長名存兒次名

桂華皆及笄季名瓜女未笄里中惡少杜景花瞰文

玘夫婦往田乃潛入求合逼其長者脅以白刃長不

從殺之繼侵仲仲又不從亦殺之並殺季女以滅口

殺而未死遂明其事萬厯時建坊旌表

扶風志

董氏胡宗顏妻扶風人夫亡年二十一甘貧撫孤五十

年嘉靖中旌表又通判胡宗儒妻高氏年二十四守

志撫孤勤苦七十年撫按俱旌之

賈志

劉氏郿縣生員王麟妻嫁踰期而麟物故劉年二十五

義不他適孀居教子六十餘年邑令旌表其門

郿志

王氏唐祿妻南鄭人祿故氏年二十七家貧鬻衣營葬

誓死守節以紡績撫教二子成名孀居四十年又生
員強振妻田氏振卒氏年二十遺孤一歲甘貧苦節

四十餘年嘉靖中俱旌表

馬志

余氏褒城諸生馬安然妻年二十餘夫死遺孤甫八月
撫摩成立為諸生旋又死復與婦撫諸孫年六十一

卒

褒城志

方氏城固生員杜臣妻年二十三臣亡氏慟哭皆盡裂
撫二子曰汝父死我不當生汝等在我又不當死忍

痛存孤年七十九終

城固志

夏氏王善繼妻城固人年二十五夫亡撫遺孤與貧甥

党傑一體教育俱得成立輿論美之

賈志

張氏庠生段平妻洋縣人年二十而寡撫育遺孤自以

詩書訓其子守節三十餘年嘉靖間建坊旌表

洋縣志

王氏吳天爵妻洋縣人年二十夫卒無嗣孝養舅姑舅

姑歿廬墓三年築土成墳嘉靖中旌表節孝又楊仕

妻王氏年十八夫亡家勢剝落撫育遺腹子竭力以

事舅姑督學楊守謙表為節孝

賈志

陳氏西鄉符鉞妻年二十而寡事舅姑曲盡孝養壽八十五卒又張氏閭朝順妻年二十九而寡後三月生

遺腹子家苦貧矢志不渝事聞並令建坊旌表

西鄉志

蔡氏太學生駱文彥妻寧羌人文彥遊太學氏傾奩給之年二十六彥逝一子甫數月家貧塵釜斷炊晏如也拮据撫子入泮子旋歿亡復撫二孫壽八十餘卒

漢中志

張氏鈕尚忠妻寧羌人聰明能文年十五夫故無子矢

志守節善事翁姑嘉靖中奏旌其門

賈志

劉氏陳寬妻榆林人年二十七寬病語曰吾死後幸無
他適劉應曰諾寬死遂自經柩前事聞詔旌其門曰

貞烈

馬志

馬氏榆林衛千戶張秉元妻秉元卒氏仰藥殉巡撫楊

守謙捐俸葬焉旌其門曰貞烈榆林衛餘丁趙鑒妻

薛氏鑒卒氏自縊死巡撫張問行旌其門

延綏志

趙氏榆林衛百戶王勤妻勤禦賊於建安堡為賊所殺氏聞之痛哭三日不食自縊而死時號為雙節詔旌

異之

馬志

張氏榆林人總兵姜爽妻邊氏榆林衛應襲白牙妻俱撫孤守節四十餘年榆林衛舍餘馮教妻麻氏年二十七教死奉姑甚孝自以詩書課二子嘉靖中長子

時吉領鄉薦

延綏志

李氏榆林衛指揮吳秉懿妻夫卒即飲藥死家人救之

復甦自是茹檠自苦每晨起焚香禮觀音祈作清淨
身聞者嘉其苦節又本衛武舉田畬妻史氏畬死撫
幼女守節家貧無倚親屬周給多却而不受嘉靖中
遭歲凶數日絕糧母子閉門待斃巡撫張珩聞之月
給米贍焉又衛民李友梧妻陳氏年二十八夫亡家
苦貧氏上奉姑嫜下撫幼孤備嘗艱苦年七十二卒
巡撫張珩表其門

延綏志

丁氏太常丞紀世梁妻榆林人世梁卒丁無出有三妾

各舉一子丁躬親撫鞠恩義備至三妾亦同以節稱
諸子相繼登科第又榆林指揮謝戡繼妻唐氏戡先
妻遺三子二女唐恩養備至戡卒長婦紀次婦田俱
少寡唐率二婦守節者數十年又鎮羌所應襲張傑
妻李氏年十九寡無子苦節五十年

延綏志

蕭氏王正蒙妻平利人蒙亡三日自縊死嘉靖四十二

年也

馮志

黃氏張必奇妻漢陰人必奇病篤氏以無子許與俱死

及卒營葬即為雙墓既殯召族人至盡推家貲散之以鐵斷門不食十二日死時嘉靖四十年也

馮志

白氏漢陰生員王一鳳妻年二十四鳳亡孝舅姑撫幼子苦節五十年又張世華妻陳氏年二十七甘貧苦節四十七年里民劉仕倌妻王氏亦守節四十年

賈志

劉氏雒南生員李翠妻翠娶劉之夕夢門豎聯曰美玉輝光揚萬里真金鍛鍊歷千迴後翠卒劉年二十三誓不再適舅姑欲奪其志氏佯許之至夜自經死有

司以聞建坊旌表時直指贈聯即前所夢之句云事

在嘉靖三十六年

雒南志

冀氏雒南張見龍妻年二十七矢節撫孤三十年其伯

嫂郭氏仲嫂李氏並守志不貳里人稱之

賈志

翟氏雒南人夫亡典簪衣以供葬事遂自縊於墓側越

三日面色如生香氣芬襲事聞建坊旌表

賈志

巧兒王璋女同州人受州人長黑流聘未行而黑流死

璋與妻往吊女遂自經於室與黑流同葬焉嘉靖二

十五年旌表

馮志

閻氏任世威妻朝邑人嘉靖中世威病死舅姑利人聘以計強載其家氏不勝憤以被蒙面自刎死又張騰霄妻王氏徐福妻岳氏韓廸妻楊氏王來召妻梁氏皆夫亡守節並膺旌典

朝邑志

党氏羅詢妻朝邑人嘉靖二十二年大饑窮民劉曹邦等為盜掠詢及富民數人於河濱盡殺之還劫其室詢子亦遇害氏匿積草中免後事寧諸被殺掠者皆

畏不敢言氏獨憤訴當道初不為理氏愈益憤恨至以豕穢塗口面肩夫脛骨號泣道旁冤聲動市人官為捕作亂者二十人置之法

賈志

李氏朝邑錦衣衛總旗李德澄女也父卒獨與生母張氏處烈女覺其污也痛父無後哀母無依大哭三日

服毒死時年十四

苑洛集

雷氏大名府同知雷爵之妹適朝邑韓繼宗年二十五繼宗卒遭繼姑之虐怒輒以簪刺其股肱流血淋漓

又遭惡叔凌害百端晝理生事夜則閉門痛哭徹夜

有司上其事勅賜旌表

苑洛集

許氏韓邦仁妻年二十四夫卒無子家用不足辛苦萬

狀巡按所屬辟節婦朝邑以十人應命巡按取年

最少而無子者三人許氏其一也

苑洛集

屈氏朝邑韓邦靖汝慶之妻華陰都御史屈直之女也

生十餘歲其父課諸兒讀經史安人刺繡其旁竊聽

背誦通曉意義汝慶髻年以神童名弱冠舉進士與

安人稱雙壁詩文倡和如良友焉汝慶早歿安人後十四年而歿有女異痛其父母繼亡父集既梓而母詩不傳以書貽許西康太史之女為母詩乞序其詞酸楚願借皮為楮削骨代穎以傳母集太史感而為之序謂有女如異五泉子未為無子也

列朝詩集

小桂韓城烈女小桂劉氏伶籍也誓願從良每伶氏問聘輒涕泣不食既長復有伶氏來問父母納其聘擇日將歸小桂知不能已大哭服毒死

苑洛集

秦氏李光被妻郃陽人光被病篤秦許以死殉被曰若弟給我耳秦曰妾請先君死頃之秦果死後八月光被死時嘉靖丙辰歲五月也

馮志

馬氏澄城廉仲祥繼室也年二十八廉亡氏撫育前妻子介過於所生曰非此無以承宗祀也茹苦含辛年踰七十未嘗一日去介介亦忘其為繼母也又孫氏同邑白洪妻洪早卒氏孀居四十餘年處妯娌以和睦育夫弟女如已出厚粧歸之邑令教左並旌其門

澄城志

王氏韓城傅傑妻慶陽真寧清江提舉司道女聰慧貞靜甫八歲授以內訓諸篇輒穎悟既歸傑姑李卧病十餘年侍奉周旋順適無方教子學禮幼出就外傳入則自示之以禮夜則口授句讀又親札影本以課倣書後學禮既登仕籍家稍裕氏尤以周貧濟急為務年七十一卒贈宜人

苑洛集

康氏武功康大史長女也通經史大義歸華州張之桀

嘉靖丙戌槩卒氏守節撫孤四十年有司旌其門

賈志

東氏華州諸生李子健妻歸健方九月而健卒遺腹生

子守節撫孤有司表之里民劉朝妻王氏年二十守

節五十三年王錦繼妻陳氏守節四十餘年又李道

妾陳氏道卒撫子聘又早卒洎婦劉氏撫教二孫以

織紉自給苦節五十二年婦亦守節二十年

賈志

徐氏陳大宗妻張氏柴良妻黃氏楊信妻皆華陰節婦

也徐年十九守節至八十七終張年二十三守節繼

姑謀逼之氏引刀截髮逃父母家守節四十六年黃

氏夫死亦守節不二嘉靖中撫按同旌焉

賈志

馮氏周儀妻同官人儀卒馮慟甚不食欲死家人強灌之則嚙其杯破曰我自安此奈何苦我至六日不死

乃自縊柩旁

馮志

景氏和順知縣白水武定繼妻定前妻遺一子尚知方五歲定歿時景氏守志撫孤視如己出延教勤劬俾

至成立時稱繼母之賢

賈志

劉氏邠州進士席勤學妻王氏楊宗仁妻夫亡守志嘉

靖時旌表

馬志

楊氏武功康栗繼室年十七歸康明年康邁疾不起氏
堅心以死殉晨起給言渴索醯湯飲砒三兩乃登廁
歸又索醯湯令極熱連飲之姑入見其色大驚搜其
袖遺砒在焉以藥與之不納逼之曰已矣吾所為以
死為樂以生為苦也奈何以苦事逼我啟篋出衣皆
手製以送死者為著之著畢而絕

王漢
陂集

康氏武功郎中康汝女適靈寶生員楊宋宋疾康許殉
舅姑百諭不能解乘間吞砒礪而死有司奏聞旌表

馬志

景氏馬萬衢妻柴氏康滿妻俱武功人景年二十三夫
死守節三十年嘉靖十三年旌表柴年二十六夫死
守節四十餘年嘉靖十七年旌表又張脆妻楊氏年
二十五而寡守節三十年亦旌表

馮志

王氏武功郝讓妻讓少失怙母武氏年二十寡居辛苦

萬狀至讓成立為取婦有子子天讓亦卒其姑及王氏親黨皆勸之嫁氏曰姑昔值舅亡盛年艾容誓死不適人者為讓耳讓今不幸死無能終養妾忍更他適耶堅意自守力作養姑終身不哀又同邑李銳妻夫亡貧無依挈女居族兄家以織紉自給女既嫁壻復死乃更與女居節操凜然幾四十年有司以聞於

上云

武功志

齊氏淳化監生郭縉妻夫亡無子縉有二妾各生子俱

改適齊年二十七以死自誓撫育妾子俱至成立嘉
靖中巡按給帛米知縣題表其門又邑庠羅九淵妻
袁氏年二十八夫卒甘貧撫孤年七十卒貢生羅雲
鳳妻鄧氏年未三十苦志撫孤邑令並旌其門又里
民王彥學妻楊氏夫亡守節撫孤至年七十卒子永
壽嘉靖癸卯舉於鄉生員羅天祐妻郭氏夫亡守節
三十年嘉靖時旌表

淳化志

王氏鄜州柳輶妻生女名瓊女年方十六嘉靖癸丑寇

至諸婦女相與謀曰如為賊掠若之何瓊女曰惟死耳賊至女痛哭大罵伏地不起賊知不可奪殺之王氏尚抱幼男賊以皮索欲引去亦落崖死之後輶數日還收子母屍葬之其色如生又吉孝妻王氏亦為賊所掠氏罵不絕口賊怒殺之

廊州志

忽氏中部舉人劉侃妻侃卒有子甫二歲忽自經柩前姑張氏泣諭曰孺子絕乳是斬夫嗣也忽氏乃撫孤守節歷五十餘年撫子芝成鄉進士嘉靖中芝自疏

母苦節以聞詔旌其門

賈志

郭氏綏德衛指揮陶輔妻正德四年輔陣亡氏撫孤子

世臣植節四十餘年綏德衛百戶余林妻柳氏林戰

死氏守節四十年巡撫楊守謙旌其門

延綏志

張氏喬遷妻葭州人年十八夫亡事孀姑盡孝姑有疾

籲天祈以身代撫藐孤成立遊宦歷有政聲卒年八

十六旌表

賈志

白氏廣威將軍鄭紀妻神木人夫死即自縊賴救不死

跪泣柩前晝夜不起飲食不進七日死又高氏神木

趙元妻嘉靖五年元陣亡氏即柩前自縊死通判莞

顏旌其門

神木志

劉氏長安馮友繼妻河南衛輝通判璽女也三歲喪母

即知哀慕長事繼母邢媼甚孝適友奉姑田氏色養

備至比臨終執氏手連呼曰我孝婦我孝婦云友官

保定府同知致政歸前妻瞿氏父母貧甚氏為衣食

之終其身以禮葬焉撫育諸從子女婚嫁悉厚遺之

恤貧睦族備致其誼隆慶己巳四十六卒

馮少墟集

賀氏咸寧舉人趙斌妻斌死京師氏聞訃痛絕誓以死

殉一日給女取水遂自縊女亦奮投井中鄰人救免

隆慶初旌表又黃運煜妾杜氏夫殂縊於柩前直指

旌其門

賈志

許氏郭民德妻魏氏王施義妻張氏李宗儒妻員氏張

崇祿妻劉氏王猷妻皆咸陽節婦也許氏年十九魏

氏年二十並守志不二張氏員氏俱二十一而寡守

節至五十年劉氏痛夫早逝茹藥餐水以終其身

賈志

宋氏張綸妻臨潼人綸死遺子女皆幼家貧甚氏甘貧

守節叔翁逼令改適氏仰藥死里人傷之

賈志

劉氏臨潼宋瑗妻年十六適瑗踰六載瑗故守節四十

餘年又張廷舉妻趙氏舉亡孝事翁姑守節五十年

邑令旌表

臨潼志

王氏高陵蕭憲妻夫亡氏矢志不貳子生員韶亦早卒

妻高氏同姑守節隆慶三年春旌為一門雙節婦

續文

獻通考

王氏張文囊妻鄆縣人年二十三文囊病卒遺二孤俱在襁褓氏堅持貞節撫育成立當道給月糧旌表壽

八十二終

鄆縣志

李氏舉人張初妻鄆縣人夫卒氏年十九子女無出日夜哭泣焚香告天誓不他從守節四十餘年事舅姑

以孝聞

賈志

馮氏生員史宗直妻鄆縣人年十四歸直五年夫亡氏

不食數日卒遺女甫一歲後三年忽奔哭於父母墓

上家人抱之歸而氣絕人以為史氏節孝焉

鄂縣志

王氏涇陽縣民任盡孝妻夫亡守節隆慶元年旌

續文獻通

考

吉氏盤屋武崇父妻崇父病疴數月氏夜不解衣目不
交睫及亡絕粒數日不死解腰經自縊經又絕乃飲
鴆死又劉氏同邑舉人張學詩妾學詩病死氏哀毀
不食每哭輒絕而復甦若是者累旬家人防之密不

得死久之防者稍懈遂潛啟柩帷自縊死

盤屋志

李氏延西衛生員張世勛妻世勛早故李誓不再適隆

慶元年旌

續文獻通考

湯氏李光達妻膚施人十九而寡碎首刺目欲以身殉

父母止之氏晝夜泣於柩前一日若見夫以車來迎

溘焉而逝即同葬焉

賈志

吳氏劉啟業妻鳳翔人十六守節以織紡養姑姑歿喪

葬盡禮卒年七十八申請建坊月給米布仍免其差

役又同邑彭彥妻王氏夫亡撫子子復夭遺腹生孫

媳復改嫁氏孤身以織紵撫之至於成立

賈志

宋氏岐山諸生張邦祚妻年二十夫卒誓不再醮以織

紡自給年七十卒又楊棟妻宋氏夫亡守義以死自

誓甘貧撫孤邑令馬彥卿並旌其門

岐山志

彭氏張附鳳妻寶雞人鳳任通判卒於官氏年二十四

哀慟幾絕生遺腹子誓以死守艱辛萬狀壽八十卒

寶雞志

彭氏寶雞強時修妻年二十三喪夫守節五十六年選貢強時進妻李氏年二十九喪夫守節五十一年院

道扁曰一門雙節

寶雞志

高氏寶雞諸生楊邁妻年十八夫亡翁姑俱老紡績供養三十年洎歿喪葬如禮又高氏同邑諸生強吉妻

年二十夫亡守節四十八年院道俱表其門

鳳翔府志

李氏生員尹來聘妻南鄭人夫亡氏年二十九孝養翁姑殯葬如禮教子作賓登鄉試官通判壽八十有五

賈志

任氏賈廷臣妻洋縣人臣亡氏年二十六無子勵節孀

居紡績以自給五十年如一日隆慶中旌表

賈志

楊氏畧陽庠生劉恢妻讀書明大義勸恢力學恢卒氏

年二十生子栢舟自矢奉文旌表歲加給卹

縣志

李氏榆林衛千戶姬曉妻曉母病卧榻者三載氏事之

甚謹鄉人稱為孝婦嘉靖初曉隨征大同死於敵氏

年二十九遺孤爵方二歲氏撫之成立守節至七十

八終又衛指揮傅潛妻張氏潛戰死氏守節三十餘

年巡撫何東序表其門

延綏志

李氏商州人邵可立母翁老患癰姑歿六子俱貧營生於外氏晨昏供養數載不渝子可立登進士官至方

伯

商州志

楊氏王思謙妻朝邑人夫亡誓不他適舅姑屢欲奪之故食以糠粃氏守益堅隆慶己巳舅姑陰納任姓之貲立逼就車氏抱幼子痛哭曰吾舍汝去矣遂自縊

死賈志

魏氏趙大彥妻邵陽人彥病殂氏自經死賈志

陳氏杜冕妻澄城人冕任眉州判卒於官氏年二十七

扶櫬歸家家計益索饑饉相繼堅貞茹苦四十餘年

邑令陳力旌其門澄城志

趙氏韓城晉四妻四死氏年二十二子昭方在抱兄弟

欲嫁之氏矢志不從食貧撫孤每汲水河上必負其

兒至水所則置之平地上汲已並負而歸率以為常

後子生孫五人曾孫繁衍

澄城志

王氏蒲城張良玉妻年二十六夫亡無子盡以家事付仲兄自鎮閉一室蓬首垢面不與人接止留一婢一婦為炊助後以疾終鄭傑妻党氏年二十夫卒剪髮自誓以織紡養親撫遺腹子有成

賈志

雷氏同官馮宣妻宋氏王民妻王氏孫守忠妻俱早寡守志嘉靖時同旌又習啟蒙妻龐氏夫亡年二十一上事翁姑下撫遺孤艱辛萬狀至八十二卒有司旌

其門

同官志

楊氏白水生員許昌言妻言故氏年二十一子尚儒
方在襁褓翁姑相繼亡仲兄利其產欲奪節氏坐卧
佩刀以死自誓後尚孺及孫性皆補弟子員氏年八

十卒

白水志

景氏邠州民池鳳鳴妻鳳鳴疾卒景氏矢志不貳以壽

終隆慶四年旌

續文獻通考

張氏神木生員劉祚妻夫亡年二十四甘貧守節撫子

克篤成選貢任蘭陽縣丞里民單汝科妻李氏年二十八夫故守節五十八年子單濤授秦府典儀兩院

旌表給米帛焉

神木志

劉氏生員楊楠妻長安人楠卒氏視棺斂畢即入室自

縊死萬厯中題旌

賈志

朱氏晉以正妻長安人以正卒氏年十九子幼孤寡以

緝紡自給守節四十九年巡按金毓峒特疏請旌

賈志

呂氏長安張濟妻濟亡氏年二十一遺孤甫二歲舅姑

欲奪其志氏矢死守孤五十七年奉文建坊旌表孫

鳳翼官潯旬太守人謂苦節之報云

長安志

馮氏長安從吾女生而言動不凡六七歲聞從吾讀書聲即願聽時或問其大義長適咸寧庠生王紹經相對如賓談必以道義從吾奪官歸家人有私悔從吾多言者氏曰士君子立朝不如此安所稱臣節從吾向紹經曰從此歸山惟有着實講學共肩斯道氏應曰父平日不曾虛講如何至今才去着實從吾聞之

懷然其事祖姑及舅姑事無巨細無不殫力萬厯丁

酉年二十二卒

馮少墟集

龐氏咸寧進士楊重熙之繼母也重熙生七歲而失其母蕭九歲而失其父翀氏適翀僅浹歲子女無出而翀卒氏撫棺且泣且誓曰傷哉天乎未亡人不難從夫於地下第有此孤在耳所不撫摩此孤而有異志者有如此棺于是茹荼孤闡幾三十年以壽終至今

鄉族稱慈繼母者必於龐母焉

馮少墟集

李氏咸寧王用相妻用相卒氏年十九生子方五月苦節自誓事翁姑存歿盡禮隆慶間採入世廟實錄萬曆三十三年賜粟帛旌其門壽九十卒又邑庠生曹言妻黃氏年二十一言亡哭踊不食誓以死殉翁姑泣諭始進饘粥撫孤成立守節四十八年道府咸旌其門又里民馬遵賢妻楊氏夫亡無子以守節著聞

咸寧
志

韓氏咸寧人孝廉李昌齡祖母十五歸李孝養備至撫

孤昌齡至通籍更歷艱辛屢經禍亂不少改文翔鳳

有傳

賈志

許氏趙良漢妻咸陽人夫亡守節撫前室子與生子無

異家貧矢死靡怨言萬歷十六年建坊旌獎

馮志

翟氏興平諸生楊休母年十八守節王某妻孔氏年二

十守節又里民王璽妻姬氏亦二十守節家貧織紵

為生萬厯中並旌

賈志

任氏臨潼趙仕東妻年二十三夫故無出誓不再嫁以

紡績事舅姑苦節四十餘年邑令表其門又王務賢妻張氏歸三年而夫故有富室求娶氏舉刀自誓守

節終身

臨潼志

趙氏史鸞妻臨潼人年二十夫故守節六十餘年其子永壽亦早故妻王氏年二十七守節三十餘年孫講又早逝妻潘氏亦守節三世貞操閭里重之

賈志

牟氏臨潼冉天敘妻年十八夫亡遺腹六月有巨室以多金賂婚氏剪髮毀面以死自誓壽九十四卒冉一

清者天敘堂弟也妻方氏年十六無子而夫卒哀痛欲自縊里黨為慰曰若死易耳如舅姑何乃擇族子士秋嗣之泣曰吾撫此奉舅姑生無愧於嫂牟死亦有以見冉氏兄弟於地下一門雙節鄉里重之

縣志

姜氏臨潼庠生王汝松妻夫故守節撫孤備極荼苦其父蓋渭南孝廉早世無子母強氏伶仃孀居五十餘年而長女適蒲城張某亦少寡守義人謂其一脉貞

操所遺云

臨潼志

周氏舉人王廷金妻臨潼人嘉靖中廷金就試禮部歿

於旅舍氏攜幼子扶櫬歸守節終身

賈志

張氏王漢妻鄠縣人漢病誓與俱死及卒氏哭之正寢
抵暮入室飲藥死事聞樹碑表其墓張太微為述烈

婦傳

鄠縣志

仝氏李勤妻鄠縣人夫故氏年十八家甚貧遺孤未三
月氏勤績絰奉孀姑姑稱其孝既歿竭蹶庀葬事成

禮厥子亦成立

鄠縣志

榮氏藍田諸生張廷妻年二十六夫故遺孤甫三月姑
及夫弟相繼淪亡榮力舉四喪紡績撫孤壽七十終
有司旌之里民榮肇端妻韓氏孫澤妻李氏蘭承賜
妻謝氏皆守節終身

賈志

葛氏生員閻視妻藍田人年二十一視殂五日不食死

萬歷二十六年旌表

馮志

樊氏藍田生員李高枝妻蘇氏劉弟妻俱年二十五夫
亡守節樊氏家苦貧以紡績撫孤壽七十卒蘇氏撫

遺腹子成立壽八十餘當道賜粟帛給匾旌之

藍田志

張四桂涇陽張倉女倉早故四桂與母李氏居年十八
隣惡少王宰以言挑之四桂心畏惡密以語母已而
母之田間從外扃其戶宰知踰牆入強之四桂據炕
欄欄毀身終不移宰用錘斷其頭而去萬厯間崇祀

烈女祠

賈志

張氏涇陽生員劉源潔妻年二十夫亡撫幼子丕基躬
操蠶織娶媳魏氏丕基又早逝魏氏年十九欲死殉

自以有疾當醫密置砒藥器中將飲張氏覺即舉器碎之因泣曰癡兒何至是汝既有志偕吾守節可矣姑婦共守張六十餘卒魏七十餘卒又楊氏里民王元登妻段氏張友顏妻夫亡年少至戚勸以改適楊正色拒之段嚙指以誓楊年八十二卒段守節三十

八年卒

涇陽志

王氏涇陽諸生張紹祖妻年二十一夫故痛哭不食七日死魏龍光妻王氏年十九夫亡誓以必死舅姑極

力勸慰歷一年值夫忌辰潛入室投繯死萬歷間並

建坊入祠

涇陽志

李氏孔有孚妻三原人有孚諸生卒無子舅姑欲奪其志李以死自誓事舅姑益謹冰操五十餘年又秦岷妻王氏年十九夫亡繼母欲嫁之氏不從家貧績紉自給處之怡然萬厯中並旌

馮志

崔氏郝緒妻三原人夫亡家貧聞議婚者泣曰吾寧餓死誓不他適逾年竟餓而死里人立碑以表其節

三原

王氏焦應選妻三原人事舅姑以孝聞夫亡守志聞父
母將有別議乃嚙指誓天欲自刎父母懼而止甘貧
教子子源溥成進士時同邑溫誥妻韓氏年二十五
守節撫孤四十年三子亦成立萬厯中並旌其門

賈志

劉氏三原秦根立妻年二十一夫亡取兄子為嗣尋亦
早喪止遺一孫未離襁祿氏撫育成立孫復先亡氏
偕孫婦共撫曾孫三世保孤遭逢尤困憊云又秦鍾

義妻張氏夫亡守節事翁姑克盡婦道萬厯中縣旌其門岳文魁妻梁氏年二十八夫喪長安扶櫬歸葬守志終身年七十六卒孫暎斗官翰林學士順治中

旌表

三原志

王氏何大錢妻蓋屋人年十七夫卒氏囑治墓者令容二棺發葬之辰自經柩側遂合葬焉

賈志

王氏張實妻蓋屋人年二十二實卒無子家人勸更志

氏嚙中指誓不他適年九十三卒奏聞旌表

賈志

張氏渭南兵部主事劉鳳池妻也年二十五夫卒無嗣
翁姑又先逝家徒壁立日居一敝樓足不踰閭者三
十年縣民田守廕妻南氏年十六歸田六月而寡苦
節四十餘年事翁姑以孝聞南軫妻武氏年二十四
夫卒撫遺腹子企仲舉進士養舅姑以壽終萬厯時
三婦俱加旌獎焉

賈志

較氏雷同妻渭南人適同時年十七隨同客居鄖陽同
病卒無子一女在祿氏水漿不入口者三日扶櫬還

葬叔翁轟吞氏產業幾盡復受張姓者賂為奪節計
氏破面剪髮以禦乃止一日自備衾木謂女曰往吾
不死者以翁姑與若耳今翁姑就窆若又嫁此吾報
夫地下時也絕粒數日而死萬厯中詔旌其門又東
氏邑庠南養仲妻養仲亡氏年十八絕粒死又王氏
邑庠曹鴻宇妻夫病籲天祈以身代及卒取兄子為
夫立嗣畢自縊死知縣楊所修碑其墓

賈志

楊氏富平王志才妻年二十才亡遺腹生子氏堅志撫

孤終身不出閭域

賈志

惠氏富平孟學孔妻萬厯間學孔為寧夏撫吏病卒氏
候喪至葬祭禮畢即更衣自縊時年二十四事聞旌
表又李寧妻王氏萬厯中甫適寧即病垂年病益篤
王料夫必不起遂自經後園中頃之寧甦婦已不救
矣崇禎元年旌表

富平志

王氏張汝清妻醴泉人年二十六夫亡遺子二女一撫
教以禮其後五世同居不言分析皆氏之家法

賈志

南氏醴泉諸生任引妻年十七守節七十年第孝思妻
劉氏亦早寡守節兩院並賜旌表舉人韓景妻袁氏
年二十六夫故孝姑撫子孀居三十餘年有司表之
又王橋妻陳氏生子方三日而夫故奉姑育子百苦
備嘗表其門曰節孝曹登妻閻氏曹科妻張氏俱無
子苦節終身表曰一門雙節又郭廷信妻高氏夫亡
後四月生遺腹子撫育成立鄭克勤繼妻程氏痛夫
早逝撫前妻子如己出子感其慈亦克盡孝張桂妻

晁氏劉業妻陳氏王廷坤妻高氏俱芳年守志誓不

二天有司咸加旌獎焉

賈志

李氏醴泉雷景妻夫早故守節家貧忍饑至死縣令姚

燭旌其門又王大吉妻張氏年二十夫故家貧氏晝

耕夜織遇歲大祲食糠粃蕪菁以育孤苦節四十餘

年

醴泉志

馬氏延安衛張世功妻綏德州侍郎汝驥女也年十九
世功亡三日不勺飲且治凶器欲同死以親族勸止

畢志守節至八十餘卒院道旌其門又延安衛百戶
王國正妻李氏年二十九夫亡哀泣幾絕水穀不入
口者數日將死殉親鄰以撫孤勸之乃止卒撫子建

德列黌序

延安志

杜氏延安人贈特進漢之長女也年十六歸鎮撫丁一
元相敬如賓久而無子杜為置二妾服御一與已同
妾生二子而一元卒杜年二十八誓以死殉弟相及
松以撫孤繼志為言杜日號泣不止未幾二孤俱殤

杜遂以哀毀卒翰林焦竑為立傳又延安衛指揮張經妻許氏經卒氏無所出媵杜氏有姓將免身應繼者爭立以其世職也氏佯許之後杜產得男氏抱示於族黨求長者名之曰淶尋聞於衛自是與媵殷勤撫摩及長教以義方後襲經職歷官協守宣府副總

兵

延綏志

楊氏延安人唘拜反遣其將王文秀狗平虜叅將蕭如薰堅守不下如薰妻楊氏總督尚書兆之女也謂如

薰曰若為忠臣吾何難為忠臣婦盡出簪珥勞軍士

妻率之守城賊攻圍數日竟不能克

紀事本末

景氏生員李恭妻安定人孝子光裕母也年二十一夫亡遺腹生裕甘心守節撫育教訓裕年十六入鄉校享年七十五邑令扁其門又諸生郝效冉妻孫氏王

恩妻李氏俱以守節稱按院給布粟焉

安定志

高氏南征吉妻安定人年二十三夫亡家貧翁早世母白氏寡叔河圖負圖甚幼氏上事孀姑下撫幼叔殫

竭心力後河圖萬厯間拔貢任雲南蒙目令負圖官
守備撫按屢旌其門又生員白誥母李氏夫亡守志
誥方七歲家甚窘以針紉供誥讀書入泮有司累旌

之

安定志

李氏郭永寧妻賀氏馬陽妻俱延長人李年十九夫亡
家貧時翁姑年俱八十且失明氏以紡績奉養撫孤
成立賀氏亦少寡撫遺腹子苦節四十年萬厯中縣
令並旌其門

賈志

曹氏生員楊一元妻延川人元疾不起氏誓以死殉既

卒即自縊救而甦復七日不食死

馮志

袁氏鳳翔諸生楊一麟妻年二十三夫亡一女尚幼苦

志撫孤年五十一卒杜文妻田氏年二十四夫亡子

幼孤寡舅姑欲嫁之氏以死自誓勤女紅孝翁姑撫

按交旌其門縣民李仲春妻張氏年二十六夫故衆

議他適氏曰餓死事小耳況未至餓死耶撫三子俱

成立萬曆八年各道俱旌表

賈志

薛氏百戶翟亮寅妻鳳翔衛人寅亡氏年二十五遺孤
連甫五歲氏養姑育子孝慈克盡連亦早亡無嗣孤
苦伶仃與婦張氏同志守節萬曆八年關西道旌其

門

鳳翔
府志

俞氏吳份妻鳳翔人份卒氏年二十八生子山甫四歲
氏守節自誓奉養舅姑舅卒葬祭以禮事姑彌篤冰
霜之操人以為難萬曆八年關西道督學道俱扁其

門

鳳翔
府志

柳氏岐山生員范弘載妻夫亡年二十泣而就死者數次撫育前妻遺子至於成立守節六十餘年里民王得威妻羅氏夫卒年二十無子誓以死殉衆救得免毀容自守五十餘年萬厯中有司並旌其門

賈志

侯氏岐山諸生張自省妻夫亡生遺腹子冰雪自持事繼姑存歿盡禮有司累表之監生王恩妻李氏年二十九甘貧守節壽九十四卒縣民李彥明妻劉氏年二十七無子家甚貧惟織紡以糊口壽七十二卒

岐志

李小圓岐山人若梓之女許字王邦寧未歸邦寧自縊
死小圓親臨赴吊一慟而絕久救得甦入厨作粥奉
姑曰聊盡婦禮從此尋夫地下端坐喪次是夜大雷
震電屋瓦皆裂母姑驚視圓已逝矣殮三日面色如
生時萬厯乙巳三月十一日也狀聞勅建烈女祠樹
坊旌表

鳳翔府志

趙氏生員張綸妻寶雞人綸歿時氏年二十二水漿不
入口者三日自剔左目以示靡他守節五十九年建

坊旌表

賈志

胡氏鄆邑生員蘇宇妻貞靜淑慎事舅姑以孝聞宇死
水操自勵訓家嚴肅教子必廷以明經顯享年八十
王某妻孔氏年十六夫亡毀容自廢矢死靡他勤績
絰以事舅姑曲盡其孝撫遺孤幾三十年以壽終又
諸生張景仲妻常氏張胤妻周氏趙瑛祖母孫氏母
柳氏楊銘母劉氏段乃成妻史氏俱茂年守節辛勤
訓子女而劉氏則督學以苦節維風扁焉

鄆縣志

劉氏麟遊諸生呂引年妻引年死於非命氏年二十止遺一女臨葬啟穴將投之家人覺而持止送歸母家復自縊以救免由是毀容守節孝養舅姑有欲奪志者氏噬指出血搥面大痛人聞而止守節三十餘年以壽終又劉氏縣民侯禹臣妻禹臣卒氏年二十五即自縊救之得免葬時復自投穴中折其左膊幾死興歸以幼子為解乃止家道素貧以耕織自給萬歷

八年關西道並旌其門

鳳翔府志

張氏麟遊諸生甄柟妻武功人也柟卒氏哀號欲絕其
季父喻以立孤死節難易氏遂勉力撫孤毀容杜門
時年二十餘子生甫五月翁姑夫三喪在柩伶仃孤
苦強自支持壽九十餘卒萬曆十三年詔旌其門又
呂氏何謚妻從夫隨翁任夫歿氏年二十餘生子甫
浹歲痛夫死異鄉嘔血幾死及歸扶櫬步行每至逆
旅抱子撫棺徹夜悲號聞者哀之抵家鳩形已不似
人營葬畢一貧如洗苦節四十餘年萬曆二十年詔

旌其門

賈志

董氏生員石可貞妻麟遊人夫卒遺子歲餘氏含辛鞠子後五年子殤遂取夫主於臥室焚香自縊萬厯中

旌表

馮志

楊氏尹希顓妻俱氏姚度妻王氏姚守官妻張氏韋臣妻皆隴州節婦也楊氏年十九遺孤浹歲矢志六十年俱氏甘貧奉姑守志六十五年俱奉文旌表王氏年二十四守節二十六年張氏守節四十二年院

並旌之

鳳翔府志

楊氏史文載妻隴州人夫亡自縊以殉萬厯中旌表又

生員閻可讓妻楊氏年二十二夫卒痛哭嘔血死

賈志

王氏南鄭諸生金簡妻嘉靖元年夫病氏割股以進夫

故年二十四無子女可依孀居五十八年縣民馮朝

江妻傅氏年二十七夫故生遺腹子善事翁姑年八

十七卒任大經妻孟氏年二十八夫故欲自盡翁姑

泣諭始勉為啜食苦節孝親撫子祿舉癸酉鄉試萬

歷十二年詔旌其閭

賈志

朱氏監生王邦偉妻南鄭御史朱綬次女也邦偉故氏年二十三守節撫孤四十餘年後子復亡氏七日不

食而死

南鄭冊

李氏褒城許襄隆妻年二十夫亡子欲標甫一歲氏撫育入庠又早死復撫孫潘亦成諸生卒年八十五又康氏褒城開山驛魯志聰妻年二十餘夫死遺二子一女子幼不能支驛役以女贅壻子與壻俱死撫甥

朝為諸生又死復撫外曾孫歷諸艱苦年九十三終

漢中志

王氏韓仲才妻城固人夫亡氏年二十六遺孤僅七月

苦節教養及長以孝稱孀居五十七年

賈志

王氏杜春輝妻洋縣人春輝與兄春芳皆諸生春輝卒
臨葬年十九王投壙內扶歸是夜自縊死後七年春
芳病篤治棺妻康氏潛令併治一棺夫問所以泣曰
妾欲不愧王氏耳比春芳卒哀痛消骨旬日不食飲

藥死萬厯二十七年詔旌曰雙烈

馮志

王氏許天祥繼妻西鄉人年十六適祥是日祥父瓊病故祥守喪次既葬廬墓服闋始歸行夫婦禮無何祥卒氏年十九遺腹纔三月甘貧績紡以奉衰姑撫前子與已子俱成立苦節六十年御史題旌又十年始克葬甫下穴紼絕棺墮地破顏色如生

柴菴疏集

張氏西鄉監生朱騰霄妻年二十七而寡遺孤袞張撫育成立娶婦吉氏未幾袞復歿吉欲以死殉賴張勸

止同心守節人羨一門雙貞云

西鄉志

劉曇妻鳳縣人失其姓夫病調治備極篤摯及歿氏縊

死

漢中志

靳氏生員王以諫妻寧羌人年十九夫亡無子氏就縊

以姑救不死已念曰姑在我何敢死於是事姑益謹

即憔悴哀毀而對姑未嘗一縐眉睫後三年姑亡遂

自刎於柩側萬曆十九年也二十一年旌

馮志

賈氏陳弟妻畧陽人年十五遇强暴欲污之氏罵不絕

口自投漢江而死

賈志

羅氏榆林參將郭金妻金亡氏不食死又榆林衛指揮龔應龍妻姜氏年三十夫死方葬嘔血死榆林衛千戶周冕妾失其姓夫卒自縊死妻劉氏亦守節終身阿捧比吉指揮僉事朶兒計臺吉妻也從套中內屬居榆林年二十六夫故痛哭不飲食尋自縊死榆林衛軍張應龍妻楊氏年三十夫故勺水不入口者六日踰歲姑與子相繼亡氏不食九日死又榆林衛軍

楊守禮妻于氏年三十夫卒勺水不下咽悲號累三

日死巡撫旌其門

延綏志

劉氏宜君女適延綏鎮楊國權年二十二喪夫無子甘

貧苦節六十四年卒

賈志

袁氏靖邊學生查瑾妻年十八瑾以救父陣亡氏聞不

食死建坊旌表

延綏志

杜氏張鳴遠妻興安人年十九夫卒族黨盡奪其貲產

氏甘貧奉親矢志愈堅萬曆四十一年巡按畢賜扁

旌其門

賈志

曹氏興安唐際嘉妻年二十夫故家貧氏上奉孀姑下撫遺腹子拮据紡績苦節四十餘年馬續光妻劉氏適光未踰年光卒遺腹纔數月氏杜門紡績奉姑課子卒以節終萬厯四十一年俱旌表

興安志

嚴氏任項之妻孫氏任豫之妻俱紫陽人嚴氏年幼喪夫號慟幾絕者數四矢志六十年課子以明經顯孫氏年二十三夫故哀慟欲自縊親族以衰姑弱子慰

之乃忍死守節脫簪珥以奉姑孀居五十餘年縣令

並旌其門

紫陽志

王氏石泉舉人安汝翼妻性莊嚴不事色笑夫歿斷親

故往來嚴婢僕出入守志三十餘年事聞旌表

石泉志

王氏胡文煥妻漢陰人年二十煥卒氏枕尸泣血不食

母嫂勸諭乃食至百日致奠盡哀次晨服始嫁衣縊

於柩旁萬厯四十四年建坊

賈志

吳氏漢陰生員藍正元妻年二十四夫亡子幼竭力奉

姑而已糟糠不厭二十年如一日里民孟學顏妻駱氏年二十七夫故守節有司申請當事並旌其門

漢陰

志

周氏商州南伯謙妻年十九夫歿子女無出與堂嫂王氏同勵冰操有司累旌之邑庠雷始奮妻孔氏年十九夫故堅守撫孤五十餘年有司歲給米布歿後題請旌表南桓妻王氏年二十三夫故止一女撫猶子為嗣苦節四十二年司道各扁旌之給米絹者數十

年

商州志

南氏商州庠生閻公述妻述故氏年十八毀容守志四十餘年常伴惟一蠹婢一日婢死曰天絕我也遂絕

食七日卒

商州志

南氏商州南文蔚之季女適雒南生員薛厚倫未逾年厚倫病劇氏日夜侍湯藥不更二手厚倫歿氏七勺不入口慟絕而蘇即以刀自剄衆持之不得遂引首觸柱又不得諸姆及眷屬環向泣慰曰爾為婦未期

何倉遽乃爾氏正色曰夫妻寧計日耶吾義當死今
惟勸我死者為愛我比漏三下鬟侍倦睡氏已就卧
內縊死其時死炎歊中面色如生蠅虻斂迹有司上

聞旌表

雒南志

李氏趙進孝妻雒南人年十九夫亡哀毀骨立親黨欲
奪其志李對姑號泣數日不食謀遂寢守節三十餘
年又監生張以治妻王氏同邑人也少寡矢志孝事
翁姑撫諸孤成立饑饉屢經節操愈勵年九十卒直

指旌其門

雒南志

何氏雒南人張守分妻守分死何年三十妾蔡氏年二

十二各遺一子俱幼同志守貞孝養翁姑死葬盡道

勤紡績治家人業子永錫中萬曆癸巳鄉試守節四

十餘年有司俱旌表

賈志

李氏江蘭妻商南人蘭卒李號哭不已至葬前一日服

毒死

馮志

吳氏同州王遷妻遷為傭以餬口值歲凶無所售傭恥

入養濟院僵卧而死氏枕屍哭一晝夜殉之

同州志

趙氏同州諸生王維德妻夫死其父母皆七十餘時二子既幼而兄嫂復歿遺幼女子三人一門孤苦氏以弱齡任之老終孤養無不曲盡萬厯四十四年奏聞旌表又諸生張汝愚妻胡氏年二十而嫠翁姑以家貧子幼勸令改適不聽乃潛謀奪節氏知即毀容歸母家撫子至冠而後還又生員董芳繼妻潘氏初適芳芳已病篤未幾歿潘年十五號泣幾死撫芳前妻

子女如已出有謀奪節者即引刀自裁太守馬材作

傳記其事

賈志

王氏潘思忠妻同州人思忠死氏甘貧苦節里豪爭欲

謀娶而不得萬曆戊子歲饑餓死室中人皆憐之

同州志

志

雷氏郃陽人適同州胡珪珪卒氏無所出乃勵節撫前

室子艱辛四十餘年

賈志

仇氏井繼妻朝邑人夫早亡遺子奈強甫三歲氏甘貧

守志撫教有方強復早逝同子婦丑氏撫育孤孫至

於成立

李聯芳傳

馬氏同州文莊公自強之孫女也適朝邑李芳春年十

八而寡撫從子文郁為嗣娶其兄女為婦不數年文

郁又死婦亦年十八姑婦守節終身有司旌其門

朝邑

志

孫氏翟可教妻朝邑人幼嫻女訓適翟未幾而翟死非

命時年二十欲以死殉家人勸曰有姑在汝死姑亦

亡矣乃忍死事姑姑時怒氏婉以承之姑九十終襄
事畢泣曰姑亡吾何待欲自經夢其姑救後卒以人
救得不死守節七十餘年又邑庠生王之翰妻井氏
年二十而寡姑以繼弗慈或勸之嫁矢以死愈孝謹
姑亦化之初氏病夢見於神自禱親終養方敢死已
而病愈其後親死葬畢未及禫而亡

朝邑志

翟氏朝邑翟可速女生員何大慶妻萬曆丁亥歲饑大
慶出糴嬰疾還氏屢祈身代知不能輒自紉襟衣誓

以同死何垂盡入室更衣自經時年十八遠近吊慰

秦聞旌表附祀烈女祠

朝邑志

李氏謝登輔妻朝邑人早寡守節上事翁姑下撫幼子

女咸有儀則四十年不復為容子自賢事母至孝

李朴

節壽
全序

雷氏王學讓繼妻朝邑人年十五歸讓五年讓死謂氏

曰我死汝早自為計勿徒苦氏飲泣不能語因指天

自誓必奉舅姑撫孤子時嘉靖丙寅歲也遂屏容飾

勵操以堅其志撫王前妻子皞如如已出皞如既貴
迎養官舍每食異味則謂皞如曰遠不能致爾祖父
母奈何其慈孝出於天植如此卒建坊旌表

王嗣美集

張烈女朝邑人世強女萬厯初字市民魏珠已而珠故
女年十六衣縞不食誓死殉以家人嚴防乃佯飲食
又為履遺珠母尋乘閒自經越三日昇就魏合窆其

面如生

賈志

張氏楊專妻朝邑人萬厯丁亥歲大侵人相食專與一

子先斃氏自投於河傍人出之氏曰我義不為乞丐

故就溺耳從容結衣履投河而死

朝邑志

張氏邵陽李白妻白卒氏不食而死曹粉容者邵陽民女也未歸而壻死父母勸其改字粉容乃投繯而死

縣聞為立石表其墓

賈志

孫氏澄城生員鄭炳妻年十八夫逝氏即墜井姑急救

之得免矢志守節縣令表其門

張邦俊傳

路氏舉人關冕妻澄城人十五歸冕踰年生子方四月

晁暴卒氏哀痛幾絕矢志撫孤以績繼孝親屢遭兵

荒堅守不易

賈志

竇氏王伯占妻韓城人伯占亡氏年二十九家貧紡績

事祖姑並姑極孝年八十四卒

賈志

李氏生員賈梧妻韓城人年十七夫故號泣幾死三日

不食翁以姪孫繼烈承嗣事翁姑極孝苦節五十餘

年壽七十四卒建坊旌表又趙楊芳妻薛氏年十九

夫卒無子以姪為嗣家貧守節年八十二卒

賈志

薛氏李煥妻韓城人煥商死河南舁櫬歸里氏號呼幾絕粒米不入口一日發奩付櫬珥釐帨於姑自飾衰

麻坐夫右死時萬曆三十六年也

賈志

郭氏東羣芳妻華州人羣芳病亟謂郭曰我死汝擇人事之郭涕泣誓以死其妾王氏曰我非婦人耶何永訣弗及我耶羣芳死郭氏命將作二棺王亦乞一棺遂作三棺為羣芳立嗣行喪三日以代三年俱縊死於柩帷左右又同里曹士魁妻王氏郭弘祖妻東氏

夫死時皆自縊死

馮志

李氏楊自卑妻華陰人夫卒年二十翁老子幼家計蕭然甘貧守節孝事繼姑督學按部屢表其門又生員楊訓妻張氏訓卒氏治大槨示必殉戚黨苦勸乃止終身垢面足不及中庭

賈志

張氏賀約禮妻蒲城人約禮亡氏年三十撫男應科遊泮科娶亦張姓女後客死於京張年二十一有娠聞訃輒自經救免生遺腹子姑婦共凜冰霜育孤入學

姑八十有一媳六十有六皆以壽終萬歷十八年旌

表雙節

賈志

孫氏單偉妻蒲城人夫亡事姑以孝聞萬歷二十五年

旌表同邑王啟勞妻夏氏夫亡守節事親鄉人稱為

孝婦

賈志

郝氏葛寬妻蒲城人夫亡年二十一姑欲嫁之氏度不

免遂自縊死萬歷三十年旌表

馮志

常氏米頤貞妻蒲城吏部澄之女給諫若桂之妹也夫

見殺於寇歸其屍自煎香湯沐浴凶服跪奠一日吉服臨焉几上設七筯各二及晚自縊死王建績妻單氏蒲城單則遷之女年二十二夫故痛哭嘔血累自盡以人救得不死明年正月初四日乘閒自縊死萬

曆四十六年旌表

賈志

劉氏潼關衛指揮使姚鎮妻夫卒氏年十七誓以死殉姑勸諭乃止以孝慈奏聞旌表又衛千戶朱英妻張氏陳端妻李氏余翰明妻何氏賁炫妻張氏孫元妻韓

氏俱夫死守節終身不渝

賈志

楊氏郭恒妻潼關人年十六許恒恒以不能納幣遂客

遊湖南久不歸父議改盟女不可斷髮自守家有巖

壁穴墻居之垂索以通飲食者二十六年恒歸氏年

四十三矣乃成禮偕老焉副使張瀚為作貞女傳

馮志

左氏安裕妻耀州人年十五歸裕裕病卒左即剪髮大

半破鏡大半置裕柩前餓十數日而死年十九萬曆

十三年建坊旌表

賈志

王氏彭邦貴妻同官人貴卒氏年二十四哀毀踰禮事
祖姑趙氏極誠敬待卑幼有恩禮趙憐其幼喻使改
適氏剪髮自殘以示不二遂守節終身性好義樂施
常思濟人不責償萬厯十年大饑輸雜糧一千石入
官賑濟有司上其事詔旌曰節義

同官志

習氏李梅妻同官人夫亡無子家甚貧親黨勸之嫁氏
曰有姑在可事遂堅貞自守有司扁其門曰節孝又
張邦彥妻党氏年二十守節事姑甚孝有司旌表又

李啓東妻梁氏年二十四夫亡孝姑撫子艱辛備嘗

八十四卒

賈志

姜氏諸生王旂妻白水人萬厯末旂被毆辱赴井死氏

聞亦投井中以殉

白水志

郭氏武功王繼祖妻繼祖早死撫遺孤乾明成立娶張氏生子受元甫襁褓乾明旋死郭與張雙節凜然受元長娶田氏不數年而受元又死遺子良臣田氏年少亦守節終身奏表其門曰三世孤孀後良臣歲貢

田年七十八卒

武功志

李氏沈來聘妻武功人夫早逝氏年少有勸之嫁者氏

曰姑在誰與為奉績紡以供甘旨者四十餘年

賈志

侯氏生員馬璟妻武功人夫病篤侯知不起先夫自縊

死

賈志

屈氏杜逢雲妻武功人歲大祲翁與夫皆就食漢南翁

死夫歸亦死氏泣曰寧以夫死故而使翁之遺骸棄

於原野乎遂徒步往漢負骸歸葬未幾餓而死

賈志

牛氏武功生員陳懋謙妻夫卒氏年十九撫遺腹子守節五十餘年萬厯中建坊旌表舉人楊纘妻李氏年二十三纘卒止一女氏撫姪為嗣守節四十餘年萬厯十三年旌表里民耿認妻恭氏年十九夫卒二子尚在襁褓氏守節教子年七十八卒縣令旌之又耿氏適岐山生員李淑世生子四日夫死氏守節二十年歸寧卒於父家子亦尋卒邑人哀之

賈志

馮氏永壽生員張簡妻年十八夫卒妾趙氏一子方周

歲騫撫育勤劬不啻已出事嫠姑以孝聞壽七十五

卒官旌其門劉宗樂妻王氏年十九夫亡撫遺腹子

成立壽七旬卒王養忠妻師氏年二十二忠亡撫一

歲孤成立壽六十卒

賈志

許氏生員樊希思妻永壽人善事翁姑妯娌無間言夫

卒嘔血死

賈志

騫氏永壽九思女幼字趙本初趙故富而騫家漸蕭索

趙竟遺書罷婚九思領之女曰不死奈辱先人何乃

澡身整服強婢導至趙門呼寃自刎而死尸不僵目不瞑溽暑色澤如生邑令庀木以殮時天開日霽而雷雨驟至一邑震驚令為撰哀詞奠之復開霽如初

永壽
志

王氏永壽組登妻夫卒氏年二十五遺子三歲孤叔翁溺其子強氏他適幸有援者子得不死後子復早卒乃撫成諸孫備嘗艱苦以壽終又李油然妻魯氏年二十五夫卒叔翁強奪其志氏截髮自誓以織絰糊

口守節三十一年

賈志

師矯姐永壽人師第女第因訟避逃捕者詣家偶牽女

衣女不勝憤恚自縊死事在萬曆三十四年

永壽志

紀氏邠州生員席太初妻萬曆中夫卒縊死柩側奉文

建坊

賈志

焦玉兒三水人有惡少夜至持斧迫氏不從遂遇害萬

曆十六年旌表

馮志

葛節婦文氏三水人少白先生之女有君子亭詩賦三

百餘首手鈔書六十卷少寡自誓作九騷九篇以見

志辭義典雅稱其風烈

列朝詩集

在中女適淳化生員葛

大受稱未亡人者四十年

賈志

武氏文太青妻天啟初太青督晉學考最屬予謨太青所著事略稱其妻武恭人之能詩也余謨制詞以秦風之女子為比太青書報予恭人讀之而喜可知也崇禎初太青以太僕少卿家居恭人歿繼室鄧氏寧河武郡王之裔也太青鰥居謀續娶家園有並頭蓮

之瑞作嘉蓮詩四百餘首鄧之父才其女而告之曰
此真可以壻汝矣太青遂委禽焉既歸於文太青以
謝韞徐淑視鄧而鄧則以孔孟伊周事太青交相得
也太青好奇如子雲構太玄經以鄧為童烏覃思少
間相與論李詩韓筆太青喜而忘寐不知更漏之深
淺春秋佳日奉太夫人版輿出遊訪未央之故丘弔
城南之遺跡太青有三出西郊記讀者豔之甲戌喪
太夫人過哀遂得風疾已而少差舌本間強鄧知其

嗜邵詩吟邵句以引之太青喉吻喀喀久之豁然應
聲壬午春病劇不起鄧為文以祭敘致婉悉關中文
士爭傳寫之踰年關陝躡鄧老矣迄不知其所終云

三水
縣志

李氏鄜州王宗堯妻年二十八夫亡以死殉救甦家至
貧誓不再嫁苦節四十年撫孤成立後以孫建屏貴

贈淑人

鄜州
志

劉氏中部人適鄜州生員宋承矩矩亡氏年二十遺腹

六月乃潛縊柩側賴姑救得蘇勸以遺腹為念後生

子呂值歲荒宗人強勸再適氏持刀自毀面目苦節

六十年事聞旌表

鄆州志

屈氏景載輝妻高氏張應奎妻俱洛川人屈年二十三

夫亡苦節撫子并撫二孤姪如已出壽七十五終高

年二十八夫卒事親終喪撫孤成立苦節四十六年

有司俱表其閭

賈志

郝拾翠洛川人年十七許聘諸生張三近納采而三近

卒女聞訃以所納幣製為衣裳服之自縊萬曆二十

二年旌表

馮志

任氏李元凱妻中部人歸數日而元凱卒父母令再嫁

不從紡績以奉舅姑事聞旌表

馮志

王氏同知張士奇妻宜君人士奇歿內外無依氏躬督

耕桑教子親良師友入夕則課其業三子俱成立次

子應辰令肅寧績最加封太宜人三膺誥命孀節四

十五年又同邑田養民妻韋氏年二十二夫故甘貧

守節撫二孤成立

賈志

楊氏郭鍾奇妻宜君人奇早卒氏自縊死

賈志

楊氏米脂光祿寺署丞艾應鍾妻少保楊尚書之女萬

曆初夫故氏年二十四孀居四十年

米脂志

劉氏白延慶妻清澗人延慶卒於旅劉年二十三聞訃

奔京邸親負骸骨歸及葬投隧道以殉諸姑力出之

遂矢志守節撫孤似科成立似科又早卒其妻劉氏

年二十五欲投崖死幸救免事兩姑撫幼子年五十

餘卒

賈志

孫氏張彥昂妻清澗人年十八夫亡越三月舉一子矢

志守節家貧忍饑以訓孤子年五十九終

賈志

劉氏生員白似玉妻清澗人夫亡氏年十七遺孤賁甫

七月矢志守節躬績紡以自給賁年十九又卒其妻

李氏年十八遺一歲孤尚文與姑相依克盡婦道無

何姑見背伯兄欲奪其志李氏抱孤號泣者累月遂

喪明知縣陳汝元表其門曰一門雙節

賈志

白氏惠道昌妻清澗人夫亡氏年十八有娠方六月欲死以殉衆諭之曰胡不少待舉子氏泣曰非不念良人無後但心痛不能須臾緩耳遂七日不食而死有司申請旌表又惠及科妻李氏夫亡年二十九即日

縊於柩側有司旌其門配享烈女祠

賈志

劉氏葭州高薦悅妻夫亡氏年二十七奉姑撫孤艱辛備嘗歷四十年又高光鼎妻張氏馬喬遴妻張氏俱

早年喪夫守節終身焉

葭州志

王氏生員李淮妻葭州人淮卒氏年二十二遺孤五歲

宗族謀奪其志氏誓死守節卒年五十有七

葭州志

某氏神木諸生辛維命妻年二十二夫亡即柩前自縊以救得免守節終身又王瑜妻張氏年二十五守節四十餘年里民張樞妻劉氏年二十六守節終身不

渝

神木志

李氏府谷舉人繼志女也適蘇萬春未久而蘇卒氏勵


志守節壽九十三歲無疾而終

府谷志

馮氏楊六斤妻府谷人事舅姑竭誠盡孝後膺旌典

府谷

志



陝西通志卷六十六